

# TUTÚ QUÍHÍ<sup>n</sup> NDAHA CUE ÑÁYIU HÈBREÚ

---

## Dútú Ndiöxí ní cachí-gá sá Dèhe-gá cada núú-gă

**1** <sup>1</sup>Te ndéé sanaha, Yá Ndiöxí ní xáha<sup>n</sup>-gă xii cue téé ní cachí iní méé-gă cada núú-gă cáhá<sup>n</sup>-güedé tnúhu-gá núú nchàa ñaní tnáhá-ó nǐ xíndecu ndéé dàvá-á<sup>n</sup> te ñi duca<sup>n</sup> nǐ quide-güedé. Te titní xito duca<sup>n</sup> nǐ xáha<sup>n</sup>-gă xii-güedé ní cáhá<sup>n</sup>-güedé tnúhu-gá. Te ndi díf<sup>n</sup> ndi díf<sup>n</sup> nǐ xítnúhu ñaha-gă xii-güedé nàcuáa cáhá<sup>n</sup>-güedé tnúhu-gá núú-yu. <sup>2</sup>Te sáta nǐ cuu vâi nduu ta yáha cuáhá<sup>n</sup>, te ní sáa nduu nǐ cachí Yá Ndiöxí sá Dèhe-gá cada núú-gă cáhá<sup>n</sup> tnúhu-gá núú-ó. Te ñi-ni mee-gă ní táuchíú<sup>n</sup> nǐ cadúha Déhe-gá ñuyíu ndihi nchaa sá íó, te ní cachí-gá sá ncháa cùu-xi cuendá Déhe-gá. <sup>3</sup>Te Déhe Yá Ndiöxí ío cànhu cuu-gá dàtná cànhu cuu mee-gá, te dàtná-ni sàni iní méé-gă ñi-ni duca<sup>n</sup> sàni iní Déhe-gá chi tnáhá-gá cúú-gă Ndiöxí, te sá cuendá tnúhu cáhá<sup>n</sup> Déhe-gá xíá<sup>n</sup> ndécú-ní nchàa sá íó ñuyíu, te duca<sup>n</sup> chi ío cànhu cuu Déhe-gá, te ñi-ni Déhe-gá ní quide nàcuáa vâ cùndècu-gá cuèchi-o. Te sáta dúcá<sup>n</sup> te ní ngóo-gá xio cùha Tátá-gă Dútú Ndiöxí Yaá ío cùnuu ndecu andi.

## Déhe Dútú Ndiöxí ío-gá cùnùu-gá dàcúxí cuè espíritú xínú cuèchi núú-gă

<sup>4</sup>Te Déhe Yá Ndiöxí ío-gá cùnùu-gá dàcúxí cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiöxí sá ío-gá cùnùu-gă dàcúxí cuè espíritú-á<sup>n</sup>. <sup>5</sup>Chi Yá Ndiöxí ñá túú ní xáha<sup>n</sup>-gă xii ní ñi<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Déhe-gá, te duha ní xáha<sup>n</sup>-gă:

Yòhó cúú-n Dèhe mee-í,  
te duca<sup>n</sup>-ni cùndecu-n núú ndécù-í.

Duha ní xáha<sup>n</sup>-gă. Te ní cachí tucu Yá Ndiöxí:

Yúhú cúù-í Tátá Yàá-á<sup>n</sup>,  
te mee-gă cúú-gă Déhe-í.

Duha ní cachí-gá. <sup>6</sup>Te cùtnáhá ní tendaha-gă Déhe-gá Yaá ío cùnùu ní quixi-gă ñuyíu-a, te ní cachí-gá:

Tàú-xi sá ncháa cuè espíritú xínú cuèchi núù-í chiñuhu-xi Déhe-í.

Duha ní cachí-gá. <sup>7</sup>Te Yá Ndiöxí ní cáhá<sup>n</sup>-gá cuendá cue espíritú xínú cuèchi núú-gă, te ní cachí-gá:

Yúhú quídè-í sá ncháá cuè espíritú xínú cuèchi núù-í cúú-xí dàtná táchí,  
te diu-ni cue espíritú-á<sup>n</sup> quídè-í sá cúú-xí dàtná itá ñuhú.

Duha cächí-gá. <sup>8</sup>Dico Déhe-gá chi ñá túú dùca<sup>n</sup> ni xáha<sup>n</sup>-gă, chi duha ní xáha<sup>n</sup>-gă:

Yòhó tnàhá-n cùu-n Ndióxi dàtná cúú yúhú Yaá cúú Tătá-n,  
te duca<sup>n</sup>-ni tàxi tnuní-n nì caa ni quíhí<sup>n</sup>,  
te ío váha ndáá quídé-n tàxi tnuní-n.

<sup>9</sup>Te dàquee tihú-n nchàa sá cuèhé sá dúhá, te cùu iní-n nchàa sá văha,

núu xíă<sup>n</sup> yúhú Yaá cúú Tătá-n nĩ quide-í sá ío-gá vii ío-gá váha cuu iní-n,

dàcúxí nchàa dava-gá ñáyiu ndècu ndihi-n.

Duha ní xáha<sup>n</sup>-gă xii Déhe-gá. <sup>10</sup>Te ní xáha<sup>n</sup> tùcu Yá Ndiöxí xii Déhe-gá:

Yòhó cúú-n Yáá ío cùnuu, chi ndéé cútnàhá ñá túú vèdana ná ío te ní cadúha-n ñùyú ndihi andiu.

<sup>11</sup>Te andiu ndihi ñuyú chi naa-xi, dico yòhó chi cundecu-ni-n nì caa ni quíhí<sup>n</sup>.

Te andiu ndihi ñuyú chi ndihi-xi dàtná ndíhí ì<sup>n</sup> dóó,

<sup>12</sup>te dàtná cuíní-n quide ñáyiu ndihi ì<sup>n</sup> dóó òré ndàcá<sup>n</sup> tnáhnü-yu tàxi ndecú-yu ì<sup>n</sup> xio, duca<sup>n</sup> càda-n ñuyú ndihi andiu,

te dàtná nádăma dóó ñáyiu duca<sup>n</sup> càda tucu-n ñuyú ndihi andiu.

Te yòhó dàtná-ni càa-n ndecu-n vitna duca<sup>n</sup>-ni cùnduu-n cundecu-n ni caa ni quíhí<sup>n</sup>, chi vá yí tnàhí-n.

Duha ní xáha<sup>n</sup> Yă Ndiöxí xii Déhe-gá. <sup>13</sup>Te Yá Ndiöxí ñá túú ní xáha<sup>n</sup>-gă xii ni ì<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Déhe-gá, te duha ní xáha<sup>n</sup> tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú úhú iní ñáhá xii-n canehe-xi sá yíñùhu núú-n.

Duha ní xáha<sup>n</sup>-gă xii Déhe-gá. <sup>14</sup>Te nchaa espíritú xínú cuèchi núú Yă Ndiöxí mee-ni chiú<sup>n</sup>-gá quídé-xí, chi tëndaha-gá cue espíritú-á<sup>n</sup> cuáhá<sup>n</sup>-xi nchaa núú ndécú cuè ñáyiu ní nduu táhú cundecu ndihi-gá chindee ñàha-xi xí-yu.

### Vá dáñá ndèé-ó tnùhu sá càhá<sup>n</sup> nàcuáa naníhí tàhú-ó

**2** <sup>1</sup>Te sá cuendá sá ío cùnuu Xítohó Jesucristú, núu xíă<sup>n</sup> ío xini ñuhu-xi cada cuendá-ó nchàa tnùhu càhá<sup>n</sup>-gá sá sà ní xíndedóho-o cuendá sá

vă dăñá ñihnu-o. <sup>2</sup>Te cue espíritú xínú cuèchi núú Yă Ndiöxí ní cáhá<sup>n</sup>-xi tnúhu-gá ndéé sanaha, te tnúhu ní cáhá<sup>n</sup> cue espíritú-á<sup>n</sup> cúú-xí sã ndáa cuiti. Te nchaa ñáyiu ñá túú ní cuení tñi nchaa tnúhu ní cáhá<sup>n</sup> cue espíritú-á<sup>n</sup>, te ni ñà túú ní cuení-yu cundedóho-yu, nchaa ñáyiu-á<sup>n</sup> ñi nacháhu-yu nàcuáa ndùu nchaa cuèchi ní quidé-yu ñi<sup>n</sup> ñi<sup>n</sup>-yu. <sup>3</sup>Te sá dúcá<sup>n</sup> ñi yáha cue ñáyiu-á<sup>n</sup>, xiã<sup>n</sup> cútnùní ndáá iní-ó sã vă cãcu nihnu-o te núu na dàña nihnu-o tnúhu sá cáhá<sup>n</sup> nàcuáa naníhí tãhú-ó, tnúhu sá ño cùnùu, chi nacháhu-o te núu duca<sup>n</sup> na càda-o. Te díhna-gá Xítóhó Jesucristú ní cáhá<sup>n</sup>-gá tnúhu-á<sup>n</sup> te nchaa ñáyiu ní xíndedóho nchaa nàcuáa ndùu tnúhu-á<sup>n</sup> ñi cáhá<sup>n</sup> ndáá-yu tnúhu-á<sup>n</sup> nũú-ó. <sup>4</sup>Te tnàhá Yă Ndiöxí cúndìhi-gá nchaa ñáyiu-á<sup>n</sup> quidé-gã nàcuáa cutnùní iní-ó sã tnũhu-á<sup>n</sup> cúú-xí tnũhu ndáá, chi quide-gá titní núú sã vă yõo tnàhí ndàcu cada te ío cùnũhu-o. Te Espíritú Yă Ndiöxí quidé-xí nàcuáa nduu tãhú-ó ndi dí<sup>n</sup> nũú chiú<sup>n</sup> cada-o nacuáa cuení méé-gã. Te sá dúcá<sup>n</sup> quide Yă Ndiöxí nchaa xiã<sup>n</sup>, xiã<sup>n</sup> cútnùní iní-ó sã tnàhá-gá cáhá<sup>n</sup>-gá sá tnũhu-á<sup>n</sup> cúú-xí tnũhu ndáá.

**Xítóhó Jesucristú ní xínduu yiqui cùnũ-gá dàtná cáá yiqui cuñú nchoo cuè ñáyiu ñuyíú-a**

<sup>5</sup>Te Yă Ndiöxí vá táxi ndècu-gá cue espíritú xínú cuèchi núú-gã taxi tnùní-xi ñuyíú sáá sã vátá quíní-gá-ó, te ñiu cuendá xiã<sup>n</sup> cãhá<sup>n</sup>-í. <sup>6</sup>Te núú tütú Yă Ndiöxí cãchí-xi:

Yòhó Dútú Ndiöxí ñá túú ñá cúú cuè ñáyiu ñuyíú nũu ndacu iní-n-yu, àdi chindeé-n-yu.

<sup>7</sup>Te yòhó ní cachí-n sã nchàa ñáyiu ñuyíú-a vá cùnùú-yu dàtná cùnùu cue espíritú xínú cuèchi núú-n, dico ní cachí-n sã sàá nduu te ío cùnùú-yu tnàhá-yu, te mee-n cãhá<sup>n</sup>-n sã ño cãhnu cuú-yu, te ní cachí tucu-n sã táxi tnùní-yu nchaa sá ñi cadúha-n.

<sup>8</sup>Te duca<sup>n</sup> nchàandi túhú sá ío quíndàhá-yu.

Duha cãchí-xi núú tütú-gá. Te sá dúcá<sup>n</sup> ñi cachí Yă Ndiöxí sá quíndàha ñáyiu ñuyíú nchaa sá ío, xiã<sup>n</sup> cútnùní sá nchàandì túhú sá ío taxi tnùní-yu, dico vátá sàá-gá nduu dùca<sup>n</sup> quíní-ó càda-xi. <sup>9</sup>Te nchoo sa nàha-o sá tnáá-ní ñi quide Yă Ndiöxí cuendá sá vă cùnùu Xítóhó Jesucristú dàtná cùnùu cue espíritú xínú cuèchi núú-gã. Te duca<sup>n</sup> ñi quide Yă Ndiöxí chi ní cundàhú iní-gá nchaa ñáyiu ñuyíú-a, chi ní cachí-gá sá Dèhe-gá cuú cuendá nchaa-yu, te Xítóhó Jesucristú ío ní ndoho-gá òré ní xíhí-gá, núú xiã<sup>n</sup> ní nduu tãhú-gã cùnùu vihi-gá vitna. Te mee Yă Ndiöxí cãchí-gá sá ño cãhnu cuu Déhe-gá.

<sup>10</sup>Te Yă Ndiöxí ní cadúha-gá nchàandi túhú sá ío nàcuáa ní cachí iní méé-gã, te sá dúcá<sup>n</sup> ñi quide-gá nũu xiã<sup>n</sup> váha-ni sá ñi cachí-gá sá Xítóhó

Jesucristú náandi ndoho-gá te cuú-gá cuendá duca<sup>n</sup> ñà túú tnàhí-gá ná cùmání-gă núú Yă Ndiöxí. Te sá dúcá<sup>n</sup> ñí cuu núú xíă<sup>n</sup> ní níhí Yă Ndiöxí nàcuáa cada-gá càndeca-gá nchaa ñáyiu cùu déhe-gá quíhí<sup>n</sup> núú ïo váha càa cundecú-yu ndíhi-gá ñí caa ñí quíhí<sup>n</sup>. Te Xítohó Jesucristú cúú-gă Yaá ní quide nàcuáa nduu táhú cue ñáyiu cundecú-yu ndíhi Yá Ndiöxí. <sup>11</sup>Te Xítohó Jesucristú cúú-gă Yaá quidé ndècu yíñuhu ñáyiu núú Yă Ndiöxí ñáyiu sàndáá iní ñáhá xii-gá, te Xítohó Jesucristú ndíhi cue ñáyiu-á<sup>n</sup> ì<sup>n</sup>-ni Yaá cúú Tătă-yu ndíhi-gá, núú xíă<sup>n</sup> Xítohó Jesucristú Yaá cúú Dêhe Dútú Ndiöxí ñá túú cùcaha<sup>n</sup> núú-gă càhá<sup>n</sup>-gá sá ñàní-gá ndíhi cúha-gá cúú nchàa ñáyiu-á<sup>n</sup>. <sup>12</sup>Te quèè ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi nàcuáa ní xáha<sup>n</sup> Xítohó Jesucristú xii Tătă-gă Dútú Ndiöxí, te duha ní xáha<sup>n</sup>-gă:

Cáhá<sup>n</sup> váha-í cuendá-n nùú nchàa cue téè cùu datná ñàní-í ndíhi núú nchàa cue ñáyiu dîhí cúú dàtná cúha-í, te cata-í ndudú chiñuhu ñaha-ï xii-n nùú tàcá-yu.

Duha yòdo tnuní núú tütú-gá nàcuáa ní xáha<sup>n</sup> Dêhe-gá xii-gá. <sup>13</sup>Te ìngá tucu xichi núú tütú Yă Ndiöxí càhá<sup>n</sup>-xi nàcuáa ní cáhá<sup>n</sup> Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tătă-í Dútú Ndiöxí.

Duha càchí-xi núú tütú Yă Ndiöxí nàcuáa ní cáhá<sup>n</sup> Xítohó Jesucristú. Te ìngá tucu xichi núú tütú Yă Ndiöxí càhá<sup>n</sup>-xi nàcuáa ní cáhá<sup>n</sup> tucu Xítohó Jesucristú, te duha ní cachí-gá:

Iha ndècu ndíhi-í nchaa ñáyiu cùu déhe Tătă-í Dútú Ndiöxí, te diu-ni ñáyiu-á<sup>n</sup> ñí taxi cuendá Tătă-í cuu cuendá-í.

Duha càchí-xi núú tütú-gá nàcuáa ní cáhá<sup>n</sup> Xítohó Jesucristú.

<sup>14</sup>Te sá cuendá nchaa ñáyiu cùu déhe Yá Ndiöxí cúú-yu yiqui cùñú, núú xíă<sup>n</sup> duca<sup>n</sup> tnàhá Xítohó Jesucristú ní cuu-gá yiqui cùñú, te duca<sup>n</sup> ñí cuu-gá yiqui cùñú cuendá cuú-gá, te sá dúcá<sup>n</sup> cùú-gá te ndacu-gá daquèè tíhú-gá sácúíhná, te diu sácúíhná-ă<sup>n</sup> quidé-xí xihí ñáyiu. <sup>15</sup>Te duca<sup>n</sup> ñí quide-gá cuendá sá cue ñáyiu ñuyíú-a vá yùhú-gá-yu sá cùú-yu, chi nchaa-ni nduu yùhú-yu sá cùú-yu. <sup>16</sup>Te na càchí tnúhu ndáá-í sá Xítohó Jesucristú ní quixi-gá cuendá chindee-gă cue ñáyiu cùu ñàní tnàhá ndíi Àbrahám, te ñá díú cuendá sá chindèe-gá cue espíritú xínú cuèchi núú Yă Ndiöxí. <sup>17</sup>Te cuendá xíă<sup>n</sup> nùu dai ní xini ñuhu-xi sá cúú-gă ñáyiu cuendá yăha-gá náandi sá yăha-gá dàtná yăha cue ñáyiu cùu ndí mee-gá cuendá duca<sup>n</sup> cùu-gá dútú ïo cùnuu te cuu ndáá-gá núú Yă Ndiöxí, te cundàhú iní-gá nchaa ñáyiu te cuú-gá cuendá sá vă cùndècu-gá cuèchi-yu núú Yă Ndiöxí. <sup>18</sup>Te mei òré ndóhó Xítohó Jesucristú ní xito ndéè ñáhá sácúíhná xii-gá te núu ndisa sá vă cadá-gă ñí ì<sup>n</sup> sá ñà túú tàú-gá cada-gá, te sá dúcá<sup>n</sup> ñí ndoho-gá xíă<sup>n</sup> nùu ndácú-gă chindèe-gá nchaa ñáyiu duca<sup>n</sup> yăha.

**Xítohó Jesucrístú ío-gá cúnùu-gá dàcúxí ndíi Moisés**

**3** <sup>1</sup>Te nchòhó cúu-ndó ñáyiù ndècu ndìhi-í ichi Xítohó Jesucrístú ñáyiù cùu cuendá Yă Ndiöxí, te tnàhá-ndó cùu-ndo ñáyiù ní cáhá<sup>n</sup> ñáhá-gă cuendá cundecu-ndo ndìhi-gá. Te yúhú càchí tnúhu-í xii-ndo sã ïo váha cada cuendá-ndó nàcuáa ndùu cuendá Xítohó Jesucrístú, chi diu-gá cúu-gă Yaá ní tendaha ñàha Dútú Ndiöxí ní quixi-gá ñuyíú-a, te diu-gá cúu-gă Dútú ïo cùnùu chi quide-gá núu Yă Ndiöxí. Te diu-ni cuendá Xítohó Jesucrístú càhá<sup>n</sup> tnúhu sá ni sàndáá iní-ó. <sup>2</sup>Te mee Yă Ndiöxí ní sáha chiu<sup>n</sup>-gá Xítohó Jesucrístú, te ío ndáá quidé-gă chiu<sup>n</sup>-á<sup>n</sup> sã cúu-xí Yă Ndiöxí, te diu-ni duca<sup>n</sup> ñí quide ndíi Moisés ní quide ndíi chiu<sup>n</sup> ní táhú Yă Ndiöxí, te ío ndáá ní quide ndíi chiu<sup>n</sup>-gá sá cúu-xí nchàa ñáyiù cùu cuendá-gá, te cue ñáyiù-á<sup>n</sup> cúu-yu dàtná vehe mee-gă. <sup>3</sup>Te ïi<sup>n</sup> téé dàcaa ïi<sup>n</sup> vehe váha ío càhnu-gá cúu-dě dàcúxí vèhe dacao-dé. Te duca<sup>n</sup> sãtnahá-xi cùu Xítohó Jesucrístú chi ío-gá càhnu cuu-gá dàcúxí ndíi Moisés. <sup>4</sup>Te nchoo sà naha-o sá ncháá vèhe dacuití ndècu cue téé ní dácáá, dico sa nàha tucu-o sá Yă Ndiöxí quidé-gă ndécú nchàa sá ïò ñuyíú-a. <sup>5</sup>Te ndíi Moisés-á<sup>n</sup> ïo ndáá ní quide ndíi chiu<sup>n</sup> ní táhú Yă Ndiöxí ní quide ndíi sá cúu-xí nchàa ñáyiù cùu cuendá-gá. Te sá dúcá<sup>n</sup> ñí quide ndíi xíá<sup>n</sup> ní cuu ndíi ïi<sup>n</sup> téé ní xinu cuechi núu Yă Ndiöxí. Te ní xáha<sup>n</sup> ndíi xii nchaa ñáyiù cùu cuendá-gá nàcuáa cáhá<sup>n</sup>-gá ndéé cuèé-gá. <sup>6</sup>Dico Xítohó Jesucrístú cúu-gă Déhe mee Yă Ndiöxí, te cùu-gá Yaá ío quide ndáá yíndàha-gá nchaa ñáyiù cùu cuendá Yă Ndiöxí. Te tnàhá-ó cùu-o ñáyiù cùu cuendá-gá, te diu-ni duca<sup>n</sup> cùu cuendá ñáhá-gă xii-o te núu na càncicú<sup>n</sup> nihnu-ni-o càni ndáá iní-ó cuendá-gá ndéé ná sàá nduu ngündecu-o ndìhi-gá.

**Cue ñáyiù cùu cuendá Yă Ndiöxí ío váha cùu iní-yu ndécú-yu ndìhi-gá**

<sup>7</sup>Te núu tütú Yă Ndiöxí yódó tnùnì nàcuáa ní cáhá<sup>n</sup> Espíritú-gá, te duha ní cachí-xi:

Te núu nchòhó ndèdóho-ndo nchàa tnúhu càhá<sup>n</sup> Yă Ndiöxí vitna,  
<sup>8</sup>te vá cùndùu sáá iní-ndó dàtná ní xínduu sàá iní ñáyiù ní dáquéé  
 tñhú tnúhu Yă Ndiöxí, ñáyiù ní xíndecu xití yucu,  
 chi ñáyiù-á<sup>n</sup> ñí xito ndéé-yu Yă Ndiöxí núu nása cada ñaha-gă  
 xíí-yu.

Duha ní cachí Espíritú-gá. <sup>9</sup>Te càchí tucu Espíritú Yă Ndiöxí nàcuáa ní cáhá<sup>n</sup> méé-gă, te duha ní cachí-gá:

Xití yucu ní xito ndéé ñáhá cuè ñanì tnàhá-ndó ñí xíndecu ndéé  
 sanaha xì-í,  
 te duca<sup>n</sup> ñí quide ñáhá-yu cuèi ní xiní-yu nchaa sá ñí quide-í ndí  
 ùdico cuíá ñí xíndecú-yu xití yucu-á<sup>n</sup>.

**10** Te sá ducá<sup>n</sup> ñí quidé-yu núu xíă<sup>n</sup> ní cudéè<sup>n</sup>-í núŭ-yu, núu xíă<sup>n</sup> ní cáhá<sup>n</sup>-í cuendá-yu, te ní cachí-í:

“Ñáyi-u-a quide-ní-yu nchaa sá ñà túú tàú-yu cadá-yu te ni ñà túú cuíní-yu cadá-yu nchaa nàcuáa sàni iní-í, te ni ñà túú cuíní-yu cadá-yu nàcuáa càhá<sup>n</sup>-í”, duha ní cáhá<sup>n</sup>-í cuendá-yu.

**11** Te xíă<sup>n</sup> núu ní cudéè<sup>n</sup>-í núŭ-yu te ní xáha<sup>n</sup> ndăá-í xíí-yu sá vă ndúú tăhŭ-yu cundecu váha-yu núú ndécù-í.

Duha ní cachí Yă Ndiöxí cächí Espíritú-gá.

**12** Te nchòhó ñáyi-u ndècu ndìhi-í ichi Xítohó Jesucrìstú, càhá<sup>n</sup>-í dóho-ndo sã ïo cada cuendá-ndo vă cání cuèhé iní-ndo te ngóo-ndo vă quindáá-gá iní-ndo Yă Ndiöxí te dañá-ndo ìchi-gá, te diu-gá cúú-gă Yaa ndécú nchàa nduu nchaa quíú. **13** Te ì<sup>n</sup> nduu ì<sup>n</sup> nduu ío chí cuăha tnàha tnúhu ndee ìní cundecu-ndo ñini ndecu-ndo ñuyíú-a cuendá sá vă xínu iní-ndo càda-ndo nándi sá cuèhé sá dúhá, te duca<sup>n</sup> te vă cúú sàá iní-ndo núú Yă Ndiöxí. **14** Te vă dáñá ndèé-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndèé cútnàhá ní tuha-o ìchi Yá Ndiöxí, te diu-ni duca<sup>n</sup> càni iní-ó ndèé ná sàá nduu vă cúndècu-gá-ó ñùyíú-a, te núu duca<sup>n</sup> na càda-o te cùu ì<sup>n</sup>nuu-o ndìhi Xítohó Jesucrìstú.

**15** Te duha càhá<sup>n</sup>-xi ì<sup>n</sup> xichi núú tùtú Yă Ndiöxí:

Te núu nchòhó ndèdóho-ndo nàcuáa càhá<sup>n</sup> Yă Ndiöxí vitna, te vă cúndùu sáá iní-ndo dàtná ní xínduu sàá iní cue ñáyi-u ní dáquée tŭhú tnŭhu-gá ndée sanaha.

Duha cächí-xi núú tùtú-gá. **16** Te cue ñáyi-u duca<sup>n</sup> ñí xínduu sàá iní-xi cùú-yu ñáyi-u ní ndeñuhu ndíi Moisés nació<sup>n</sup> Ègiptú, te ñáyi-u-á<sup>n</sup> ñí xíndedóho-yu tnúhu ní cáhá<sup>n</sup> Yă Ndiöxí te ní quide sàá iní-yu ní dáquée tŭhŭ-yu tnúhu-gá. **17** Te ndi ùdico cuíá ñí xúhu<sup>n</sup>-yu ichi ío ní cùdée<sup>n</sup> Yă Ndiöxí núŭ-yu cuendá sá ñí quidé-yu nándi nchaa sá cuèhé sá dúhá, te ñáyi-u-á<sup>n</sup> ñí xíhí-yu xití yucu. **18** Te nchaa ñáyi-u-á<sup>n</sup> ñà túú ní cuíní-yu tníŭ-yu tnúhu ní cáhá<sup>n</sup> Yă Ndiöxí núu xíă<sup>n</sup> ní cáhá<sup>n</sup> ndáá-gá sá vă ndúú tăhŭ-yu cundécú-yu núú ïo váha càa ndecu-gá. **19** Te xíă<sup>n</sup> núu nchoo cùtnuní iní-ó sã nchàa ñáyi-u-á<sup>n</sup> ñà túú ní ndùu táhŭ-yu cundecu váha-yu núú ndécú-gă, chi ñá túú ní sàndáá iní-yu tnúhu ní cáhá<sup>n</sup>-gá.

**4** **1** Te vitna ndècu ndìhi-gá-ó tnŭhu Yá Ndiöxí tnúhu sá dánèhé ñáhá xii-o sá cúú cùndecu váha-o núú ndécú-gă, te tàú-xi quiyùhú iní-ó chi na cuáhá<sup>n</sup> te vă ndúú tăhŭ-ó cùndecu váha-o núú ndécú-gă. **2** Te tnàhá nchoo ñí ngúndecu ndìhi-o tnŭhu sá càhá<sup>n</sup> nàcuáa naníhí tãhŭ-ó dàtná ní xíndecu ndìhi cue ñáyi-u ndée sanaha, dico ñáyi-u-á<sup>n</sup> chi ñá túú vèdana ni nàndíhi-xi cuèi ní xíndedóho-yu tnúhu-á<sup>n</sup> chi ñá túú ní sàndáá iní ñáhă-yu xii-gá. **3** Dico nchoo cùu-o ñáyi-u ní sàndáá iní tnúhu Yá Ndiöxí, núu xíă<sup>n</sup>



nduu táhú-ó cùndecu váha-o núú ndécú-gă, te ní quee ndáá-xi nàcuáa cãhá<sup>n</sup>-gá núú tütú-gá núú cãchí-xi:

Yúhú ní cudéè<sup>n</sup>-í núú-yu, te ní cãhá<sup>n</sup> ndáá-í sá vă ndúú tãhũ-yu cundecu váha-yu núú ndécù-í.

Duha ní cachí-gá. Te cuu nduu táhũ-yu cundecu váha-yu núú ndécú Yă Ndiöxí ní cùu, chi sa ní xínu cava nchaa chiu<sup>n</sup> ní quide-gá sá nĩ cadúha-gá ñuyú. <sup>4</sup>Te núú tütú Yă Ndiöxí cãhá<sup>n</sup>-xi nàcuáa ní quide-gá nduu úsá, te duha cãchí-xi:

Yá Ndiöxí ní quide chiu<sup>n</sup>-gá íñú nduu ní quide-gá nchaa chiu<sup>n</sup>-gá te ní ndetatú-gá nduu úsá.

Duha cãchí-xi núú tütú-gá. <sup>5</sup>Te cãchí tucu-xi núú tütú Yă Ndiöxí nàcuáa ní cãhá<sup>n</sup>-gá cuendá cue ñáyiu ndéé sanaha, te duha ní cachí-gá:

Cue ñáyiu-a vá ndúú tãhũ-yu cundecu váha-yu núú ndécù-í ndétátú-í.

Duha ní cachí-gá. <sup>6</sup>Te ñáyiu ní xíndedóho tnúhu sá cãhá<sup>n</sup> nàcuáa naníhí tãhú-ó ndéé sanaha, ñá túú ní ndùu táhũ-yu cundecu váha-yu núú ndécú Yă Ndiöxí ndétátú-gá, te duca<sup>n</sup> chi ñá túú ní sãndáá iní ñáhã-yu xii-gá, dico ió-gá ñáyiu nduu táhú cundecu váha núú ndécú-gă ndétátú-gá. <sup>7</sup>Te ní xica cuéhé nduu sá dúcá<sup>n</sup> ñà túú ní sãndáá iní ñáhã ñáyiu-á<sup>n</sup> xii-gá, te dãtnùní ní cãhá<sup>n</sup> ndíi Dãvíi yuhu-gá nàcuáa cada-gá vitna, te ñiu-ni nàcuáa sa yòdo tnuní ñiu-ni duca<sup>n</sup> chido tnuní tucu-í nàcuáa ní cãhá<sup>n</sup> ndíi yuhu-gá, te duha ní cachí-gá:

Te núú nchòhó ndèdóho-ndo tnũhu cãhá<sup>n</sup>-í te vá cádá sàá iní-ndó.

Duha ní cachí-gá. <sup>8</sup>Te ndíi Jòsué ní sanu ichi ndíi ñáyiu núú quíhí<sup>n</sup>-yu cundecu váha-yu, dico ñá díú cuendá xíã<sup>n</sup> ní cãhá<sup>n</sup> Yă Ndiöxí, chi cuendá nàcuáa cada-gá vitna ní cãhá<sup>n</sup>-gá. <sup>9</sup>Núu xíã<sup>n</sup> sáá nduu ndùu táhú nchaa ñáyiu cùu cuendá Yă Ndiöxí ngúndecu váha-yu núú ndécú-gă ndétátú-gá. <sup>10</sup>Te nchaa ñáyiu duca<sup>n</sup> na ndùu táhú cundecu váha núú ndécú Yă Ndiöxí ndétátú-gá, te tnãhá-yu ndetatú-yu cuendá nchaa sá văha ní quidé-yu dàtná ndétátú méé-gă. <sup>11</sup>Te xini ñuhu-xi sá nchóó ño nducu ndèe-o nducu-o nàcuáa cada-o cuendá nduu táhú-ó ngúndecu váha-o núú ndécú Yă Ndiöxí ndétátú-gá, chi na cuáhã<sup>n</sup> dava-ndo càda-ndo datná ní quide cue ñáyiu ñá túú ní sãndáá iní ñáhã xii-gá, te vá ndúú tãhũ-ndó cùndecu váha-ndo núú ndécú-gă te núu duca<sup>n</sup> na càda-ndo.

<sup>12</sup>Te tnúhu Yá Ndiöxí cúu-xí dàtná ñi<sup>n</sup> sá nchító-ó chi quide-xi nãndi sá quidé-xí, te cùu-xi datná ñi<sup>n</sup> sá dĕé<sup>n</sup> víhí-gă dàcúxí ñi<sup>n</sup> yuchí sá ndéé úú xio núú-xi. Te duca<sup>n</sup> sãtnahã-xi cùu tnúhu-gá chi quée-xi iní-ó, te dãndixi túu-xi nchaandí túhú sá sání iní-ó te núu quide váha-o àdi ñá túú quide váha-o ndècu-o. <sup>13</sup>Te ni ñi<sup>n</sup> sá nĩ cadúha Yá Ndiöxí vá cání iní-ó sã

ndácú-xí nguïvãha-xi núú-gã, chi nchaandi túhú sá sání ìní-ó ndècu túu-xi núú-gã, te ñiu núú Yàá-á<sup>n</sup> na càni cuendá-ó nchàa sá quidé-ó.

### Xítóhó Jesucrìstú cúú-gã Dútú ïo cùnuu

14Te Xítóhó Jesucrìstú cúú-gã Dútú ïo cùnuu ndecu ndihi-o, te ñiu-gã cúú-gã Déhe Dútú Ndiöxí, te Yaa-á<sup>n</sup> cuãndaa-gá andiu ñi nucúndecu-gá núú Yã Ndiöxí, núu xiã<sup>n</sup> tàú-xi sá cáncñicú<sup>n</sup> nihnu-ni-o quëndáá ìní-ó-gã.

15Te mee Yaa-á<sup>n</sup> ïo cùnuu-gã cúú-gã dútú-ó ndècu ndihi-o, te ío na cùndahú ìní ñáhá-gã xii-o cuendá sá ñã ñihí ndéé-ó cùndecu-o. Te duca<sup>n</sup> càda-gã chi ní yáha-gã dàtná yãha mee-o, chi nchaa sá ñi yáha-gã-á<sup>n</sup> ñi cuu-xi sá cáda-gã nándi nchaa sá cuèhé sá dúhá ní cùu dico ni ñi<sup>n</sup> ñá túú ní quide-gã. 16Núu xiã<sup>n</sup> tàú-ó sã nchóó ñi yuhu ni ìní-ó cãhá<sup>n</sup> ndihi-o Yã Ndiöxí Yaa ío cùndahú ìní ñáhá xii-o chindee ñaha-gã, te duca<sup>n</sup> càda-o te cundahú ìní ñáhá-gã chindee ñaha-gã xii-o ndèda-ni càa oré xíní ñuhu-o-gã.

**5** 1Te nchaa cue dútú cùnùu núú ñáyiu isràél ñiu-ni ñáyiu cùu-güedé, te duca<sup>n</sup> ñi ngúndecu-güedé cuendá cada-güedé chiú<sup>n</sup> sá cúú-xí Yã Ndiöxí cuendá-yu, chi ñiu cue téa-á<sup>n</sup> ñi xóo nacani cuendá-güedé núú-gã quiti ní xóo cahni-güedé ní xóo nduu táhú-gã, te duca<sup>n</sup> ñi xóo cada-güedé cuendá sá cáda càhnu ìní Yã Ndiöxí cuéchi-yu, te duca<sup>n</sup> ñi xóo nacani cuendá tucu-güedé núú-gã nchaa dava-gã sá ñi xóo ñihí-güedé ní xóo nduu táhú-gã. 2Te nchaa cue dútú-á<sup>n</sup> ñi xóo cundee ìní-güedé nchaa sá ñi xóo cada nchaa ñáyiu ñá túú ní quide ndáá ñáyiu ñá túú cùnùnì ìní-xi, te duca<sup>n</sup> ñi xóo cada cue dútú-á<sup>n</sup> chi tñahá-güedé ñá túú ní xóo ñihí ndéé-güedé cundecu-güedé cuendá nchaa sá ñi xóo yáha-güedé. 3Te sá cuendá sá dúcá<sup>n</sup> ñá túú ní xóo ñihí ndéé-güedé ñuu xiã<sup>n</sup> dai ní xini ñuhu-xi sá tñahá-güedé cuáha-güedé Yã Ndiöxí sá ndúú táhú-gã cuendá méé-güedé dàtná quidé-güedé cuendá ñáyiu.

4Te ni ñi<sup>n</sup> téa vá ndácú-dé cuu-dé dútú cùnùu cuendá-ni sá càchí ìní méé-dé te núu ñá díú mèe Yá Ndiöxí duca<sup>n</sup> cuìní-gã sá cúú-dé dútú cùnùu datná ní quide-gã ndíi Àrón. 5Te cuèi Xítóhó Jesucrìstú chi ñá díú mèe-gã ní quide-gã méé-gã ñi<sup>n</sup> dútú cùnùu nacuaa cada ñinu-gã méé-gã, chi mee Tãtã-gã Dútú Ndiöxí duca<sup>n</sup> ñi cachí-gã sá cúú-gã Dútú cùnùu, te duca<sup>n</sup> chi Yá Ndiöxí ní xáha<sup>n</sup>-gã:

Yòhó cúú-n Dèhe-í,

te cuìní-í sá dúhá-ní cùndecu-n núú ndécù-í.

Duha ní xáha<sup>n</sup>-gã xii Xítóhó Jesucrìstú. 6Te núú tütú Yã Ndiöxí yódó tñunì nàcuáa ní xáha<sup>n</sup> tucu-gã xii Xítóhó Jesucrìstú, te duha ní xáha<sup>n</sup>-gã:

Yòhó cúú-n dütú cundecu ni caa ni quíhí<sup>n</sup>,

te cùu-n datná ní cuu ndíi Melquisèdec.



Duha ní xáha<sup>n</sup>-gă xii Xítóhó Jesucrístú. <sup>7</sup>Te cútnàhá ní xíndecu Xítóhó Jesucrístú ñuyíú-a te níhi ní xóo cáhá<sup>n</sup> ndihi-gá Yă Ndiöxí te ní xóo cáhá<sup>n</sup> ndàhú-gá núú-gă, te ní xóo ndáhyú-gá òré duca<sup>n</sup> ñí xóo cáhá<sup>n</sup> ndihi-gá Yă Ndiöxí, te duca<sup>n</sup> ñí quide-gá chi nàha-gá sá Yă Ndiöxí cúú-gă Yaá ndacu dàcácu nihnu ñaha xì-gá cuèndá sá vă cùú dúcá<sup>n</sup>-gă. Te Yá Ndiöxí ní xíndedóho-gá nchaa tnúhu ní cáhá<sup>n</sup> Xítóhó Jesucrístú cuèndá sá ñí quide-gá nchaa nàcuáa ní xáha<sup>n</sup> Yă Ndiöxí cada-gá. <sup>8</sup>Te sá cuèndá nchaa sá ñí ndoho Xítóhó Jesucrístú xíă<sup>n</sup> ní cutnùnì iní-gá cada-gá nchaa dava-gá sá vâha nàcuáa cuìnì méé Yă Ndiöxí cada-gá. Te duca<sup>n</sup> ñí cuu cuèi cùu-gá Déhe Yá Ndiöxí. <sup>9</sup>Te sá dúcá<sup>n</sup> ñí quide-gá nchaa nàcuáa cuìnì méé Yă Ndiöxí, xíă<sup>n</sup> ñúu vitna cùu-gá Yaá dácăcu nihnu nchaa ñáyiu sàndáá iní ñáhá xì-gá núú ùhú núú ndàhú. <sup>10</sup>Te mee Yă Ndiöxí ní cachí-gá sá Xítóhó Jesucrístú cúú-gă dútú cùnùu datná ní cunuu ndíi Melquisèdec cútnàhá ní cuu ndíi dútú ñuyíú-a.

### Cuèndá ñáyiu cuìnì dañà ñihnu ichi Yá Ndiöxí

<sup>11</sup>Te vâi-gá tnúhu ndècu cáhá<sup>n</sup>-í nàcuáa ndùu cuèndá Xítóhó Jesucrístú, ndihi ndíi Melquisèdec, te dícó-ni sá nchòhó ío cuèè tècú tnùnì-ndó, te yúhú ío úhú ñihí-í nàcuáa cáhá<sup>n</sup>-í nàcuáa tecú tnùnì-ndó.

<sup>12</sup>Te nchòhó sa ní cuu cuéhé nduu ndècu-ndo ichi Xítóhó Jesucrístú, te tàú-ndó dānehé-ndó cuè ñáyiu ndècu ichi-gá tnúhu-gá ñúu dícó sá cúú, dico xìni ñuhu-ni-xi sá cùndècu ñáyiu danèhé ñáhá tnúhu-gá xii-ndo, tnúhu sá ñí dācuáhá-ndó ndèé dīhna sá ñà túú ùhú tecú tnùnì-ndó. Te sá dúcá<sup>n</sup> quide-ndo núu xíă<sup>n</sup> cúú-ndó dàtná cue landú vitna sàdi camá, landú vátá cúú-gă caxi dítá. <sup>13</sup>Chi nchaa ñáyiu cùu datná landú vitna sàdi, ñáyiu-á<sup>n</sup> cúú nèñuú-yu ñà túú cùtnunì iní-yu nàcuáa càhá<sup>n</sup> tnúhu sá càhá<sup>n</sup> nàcuáa cada ndáá-yu cundecú-yu. <sup>14</sup>Te nchaa sá vátá cúú-gă caxi cue landú yíquí<sup>n</sup> xíă<sup>n</sup> cúú-xí cuèndá cue ñáyiu sacuéhé, te xíă<sup>n</sup> cúú-xí dàtná tnúhu sá dācuàha ñáyiu sa ní níhí ndèé ndècu ichi-gá, ñáyiu sa ní cutnùnì vâha iní-xi nāndi cùu nchaa sá cuéhé sá dúhá, ndihi nāndi cùu nchaa sá vâha.

**6** <sup>1</sup>Te xíă<sup>n</sup> ñúu vitna xìni ñuhu-xi dacuaha-o dava-gá tnúhu Yá Ndiöxí cuèndá duca<sup>n</sup> te cuu-o ñáyiu tècú tnùnì nchaa tnúhu-gá. Te xìni ñuhu-xi sá ncháá tnúhu Xítóhó Jesucrístú sá ñí dācuáhá-ó ndèé dīhna vā dācuàha-gá-ó dàtná ní dācuáhá-ó chi sa tècú tnùnì-ó. Te ñà túú-gă xìni ñuhu-xi dacuaha-o datná ní dācuáhá-ó ndèé dīhna nàcuáa cada-o ndixi cuéchi iní-ó cuèndá nchaa sá cuéhé sá dúhá quide-o, sá tá dācuíta nihnu ñaha xì-o cuáhá<sup>n</sup> ní cùu. Te duca<sup>n</sup> vā dācuàha-gá tucu-o dàtná ní dācuáhá-ó ndèé dīhna nàcuáa cada-o quèndáá iní-ó Yă Ndiöxí, <sup>2</sup>ndihi cuèndá nàcuáa ní dācuáhá-ó nàcuáa cuandute-o, ndihi cuèndá nàcuáa

cada-o càcá<sup>n</sup> ndodo-o ndàha-o díquí ñáyiú ní sándáá iní ñáhá xii-gá. Te duca<sup>n</sup> ñà túú-gă xíní ñùhu tucu-xi dacuaha-o datná ní dácúáhá-ó ndéé díhna cuendá nàcuáa ndoto cue ñáyiú ní xíhí, ndihi cuendá nàcuáa ní dácúáhá-ó sã Yă Ndiöxí daquihí<sup>n</sup>-gá ñáyiú núú ùhú núú ndàhú ni caa ni quíhí<sup>n</sup>. <sup>3</sup>Te núú Yá Ndiöxí ná càchí-gá, te cuita dacuàha-gá-ó nchàa dava-gá tnúhu sá cúmăní quíhí<sup>n</sup>.

<sup>4</sup>Te cue ñáyiú sa tècú tnùní tnúhu Yá Ndiöxí, ñáyiú sa xíní nchaa nàcuáa ndùu nchaa sá vâha quide ñaha Yá Ndiöxí xii-o ndìhí-yu, ñáyiú sa chindee ñaha Espíritú Yă Ndiöxí, <sup>5</sup>ñáyiú sa cùtnuní iní-xi sá ïo váha tnúhu Yá Ndiöxí, ñáyiú sa xíní nàcuáa ta quide Yá Ndiöxí véxi nchaa sá vă yôo tnàhí ndàcu cada, <sup>6</sup>te núú ñáyiú-á<sup>n</sup> ná ngüita tucú-yu daquèe tíhú duú<sup>n</sup>-yu tnúhu Yá Ndiöxí, te vá ndácú-gă-ó nà canu ichi-ó-yu nàcuáa ndixi cuéchi iní-yu te núú duca<sup>n</sup> na càdá-yu, te sá dúcá<sup>n</sup> ná càdá-yu te tnàhá-yu cùú-yu dàtná cue téé ní sahani ñaha xii Xítóhó Jesucristú Déhe Yá Ndiöxí núú cùrúxí. Te sá dúcá<sup>n</sup> ná càdá-yu te ngóo dava-gá ñáyiú cáhá<sup>n</sup> cuèhé-yu cuendá Xítóhó Jesucristú. <sup>7</sup>Te nchaa ñáyiú cùú-yu dàtná ñuhu, chi ñuhu-á<sup>n</sup> ndi tnahá òré cúú<sup>n</sup> dăú te xíhi-xi ndute, te dava ñuhu váha cùu sá xítú ñáyiú, te sá cúú núú ñuhu-á<sup>n</sup> ïo nàndíhi-xi, te mee Yă Ndiöxí quidé-gă cúú sã vâha núú ñúhú-ă<sup>n</sup>. <sup>8</sup>Dico núú da ñnu na ndàa núú ñuhu-á<sup>n</sup> te ñá túú vèdana nàndíhi-xi te núú duca<sup>n</sup>, te Yá Ndiöxí vá cúú vâha iní-gá cuendá ñuhu-á<sup>n</sup> sã dúcá<sup>n</sup> dà ñnu ndaa núú-xi, te ñnu-á<sup>n</sup> ndihi-xi cáyú. Te duca<sup>n</sup> sãtnahá-xi cùu ñáyiú dàquee tíhú tnúhu Yá Ndiöxí chi ñá túú cùu váha iní-gá núú-yu.

#### Níhí-ó sã ndétú-ó ndùu táhú-ó

<sup>9</sup>Te cuèi duha càhá<sup>n</sup>-í dico nchòhó cue ñáyiú ïo cùu iní-í, chi cùtnuní ndáá iní-í sá vă càdá-ndó dàtná xiquide dava-gá ñáyiú, te mee-ni sã vâha cuu xii-ndo chi cùu-ndo ñáyiú sa ní naníhí tàhú. <sup>10</sup>Te duca<sup>n</sup> chi Yá Ndiöxí cúú-gă Yaá ïo váha quide ndáá, te vá dáná ndòdo iní-gá nchaa sá vâha quide-ndo, te ni vă dáná ndòdo iní-gá nàcuáa quide-ndo cuu iní-ndó-gă, te sá dúcá<sup>n</sup> quide-ndo cuu iní-ndó-gă xíă<sup>n</sup> chindèe-ndo cue ñáyiú ndècu ndihi-ndo ichi Xítóhó Jesucristú, te duca<sup>n</sup>-ni ta quide-ndo véxi ndéé vitna. <sup>11</sup>Te cuiní-í sá ïi<sup>n</sup> ïi<sup>n</sup>-ndo nducu ndee-ndo cada-ndo nacuáa cuiní Yă Ndiöxí dàtná tá quide-ndo véxi, te diu-ni duca<sup>n</sup> càda-ndo ndéé ná sàá nduu ndùu táhú-ndó cùndecu-ndo ndihi-gá núú ndécú-gă, te duca<sup>n</sup> te níhí-ndó nchàandi túhú sá ndétú-ndó ndùu táhú-ndó cùndecu ndihi-ndo ni caa ni quíhí<sup>n</sup>. <sup>12</sup>Te yúhú cuiní-í sá nchòhó vá tühío-ndo càda-ndo nchaa nacuáa cuiní Yă Ndiöxí, te cada-ndo dàtná quidé ñáyiú sàndáá iní tnúhu-gá, ñáyiú càhnu iní-xi. Te sá dúcá<sup>n</sup> quidé-yu xíă<sup>n</sup> nihí-yu nchaa sá ñí cachí Yă Ndiöxí nduu táhú-yu.

13Te cútnàhá ní xáha<sup>n</sup> Yă Ndiöxí xii ndíi Àbrahám nàcuáa cada-gá, te ní cacunehe-gá méé-gă nàcuáa cutnùnì iní ndíi sá ndàá cada-gá nàcuáa ní xáha<sup>n</sup>-gă xii ndíi, te vá yõ ì<sup>n</sup> ni càcunehe-gá cuèndá sá quìndáá iní ndíi tnúhu ní cáhá<sup>n</sup>-gá. Te duca<sup>n</sup> nǐ quide-gá chi ì<sup>n</sup>dìi díi-ni mee-gă ío cùnuu-gá. 14Te duha ní xáha<sup>n</sup>-gă xii ndíi Àbrahám: “Yòhó té Àbrahám na càchí tnúhu ndáá-í xii-n sǎ ìo chindee ñàha-í xii-n, te cáyá cuéhé víhí ñàni tnáhá-n”, duha ní xáha<sup>n</sup>-gă xii ndíi. 15Te ndíi Àbrahám ío ní quide ndee ìní ndíi ní xíndetu ndíi, te duca<sup>n</sup> te Yá Ndiöxí ní quide-gá nàcuáa ní xáha<sup>n</sup>-gă cada-gá sá cúú-xí ndíi. 16Te núu ì<sup>n</sup> ñáyiu càhá<sup>n</sup> ì<sup>n</sup> tnúhu ndáá cuítì te càcu nehé-yu Yá Ndiöxí cuèndá quíndáá iní tnàha ñáyíú-yu tnúhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñá túú-gă sá dácàá ñáyiu càhá<sup>n</sup> ndihí-yu cuèndú. 17Te duca<sup>n</sup> nǐ quide Yá Ndiöxí ní cáhá<sup>n</sup> ndáá-gá sá cádá-gă nàcuáa ní cachí-gá, te duca<sup>n</sup> nǐ cáhá<sup>n</sup>-gá cuèndá nchaa ñáyiu ní cachí-gá nduu táhú sǎ cádá-gă nàcuáa cutnùnì iní-yu sá quídé-gă ì<sup>n</sup> sá càhá<sup>n</sup>-gá, te ni ñà túú nàdáma-gá ì<sup>n</sup> sá càhá<sup>n</sup>-gá. 18Te nchoo nǐ natuha-o Yă Ndiöxí cuèndá dàcácu nihnu ñaha-gă xii-o nǔú ùhú núú ndàhú, te ní níhí-ó tnǔhu ndee ìní ndécú ndìhi-o cuendá sá vǎ dǎná ndèé-ó cùndetu-o sáá nduu ndùu táhú-ó cùndecu-o ndìhi-gá. Te duca<sup>n</sup> nǐ níhí-ó tnǔhu ndee ìní chi Yá Ndiöxí ní cáhá<sup>n</sup> ndáá-gá sá cádá-gă nàcuáa ní cachí-gá, te ñá túú dándahú ñáhá-gă, te ni ñà túú nàdáma-gá ì<sup>n</sup> sá nǐ cachí-gá cada-gá. 19Te tnúhu ndee ìní ndécú ndìhi-o xǎ<sup>n</sup> quídé-xí cùtnunì ndáá iní-ó sǎ ndúú táhú-ó cùndecu-o ndìhi Yá Ndiöxí núú ndécú-gă, te duca<sup>n</sup> cùtnunì ndáá ndisa iní-ó sǎ cuèndá Xítohó Jesucrìstú Yaá ndécú nǔú Yă Ndiöxí. 20Te duca<sup>n</sup> nǐ nucúndecu Xítohó Jesucrìstú núú Yă Ndiöxí cuèndá duca<sup>n</sup> cànchicú<sup>n</sup> nihnu-o càda-o, te duca<sup>n</sup> nǐ nucúndecu-gá núú Yă Ndiöxí chi cùu-gá dútú cúnùu datná ní cunuu ndíi Melquisèdec ñuyíú-a, te duca<sup>n</sup>-ni cùu-gá dútú cúnùu ni caa ni quíhí<sup>n</sup>.

### Xítohó Jesucrìstú cúú-gă dútú dàtná ní cuu ndíi Melquisèdec

**7** 1Te ndíi Melquisèdec ní xíndaha ndíi cue ñáyiu ñúú Sàlém, te ní cuu ndíi dútú nǐ xinu cuechi ndíi núú Dútú Ndiöxí Yaá ío cùnuu. Te ndíi Melquisèdec-á<sup>n</sup> nǐ xícá<sup>n</sup> táhú ndíi núú Yă Ndiöxí cuèndá ndíi Àbrahám cútnàhá ní sáhá<sup>n</sup> ndíi Àbrahám-á<sup>n</sup> nǐ nàá ndíi ndìhi cue dava-gá cue téé yìndaha ñáyiu. Te cue téé-á<sup>n</sup> ñà túú ní ndàcu-güedé nàá-güedé ndìhi ndíi Àbrahám-á<sup>n</sup> chi ní xíta-güedé. 2Te nchaa sá nǐ níhí ndíi Àbrahám-á<sup>n</sup> nǔú nǐ nàá ndíi, te ní quide ndíi úxí xichi te ì<sup>n</sup> xichi núú ùxí-á<sup>n</sup> nǐ sǎñaha ndíi xii ndíi Melquisèdec. Te òú ndíi Melquisèdec-á<sup>n</sup> quée-xí: Téé ío váha quide ndáá yíndaha ñaha xii ñáyiu, duha quèe-xi. Te ní xóo danàni ñahá-yu xii ndíi Téé yìndaha ñúú Sàlém, duha ní xóo danàni ñahá-yu. Te tnúhu Sàlém-á<sup>n</sup> quée-xí: Ñúú ndécú nàhi, duha quèe-xi tnúhu-á<sup>n</sup>. Núú xǎ<sup>n</sup> quée

tùcu-xi nacuaá nàni ndíi Tée yìndaha ñuú ndécú nàhi, duha quèe tucu-xi ñuú ndíi. <sup>3</sup>Te ñá túú tnùhu núu yoo cùu tátá ndíi ndíhi náná ndíi, te ni ñà túú tnùhu núu yoo cùu xíi ndíi ndíhi xítná ndíi, te ni ñà túú tnùhu núu nándi cùu ñáyiú ní cuu ñaní tnáhá ndíi ní xíndecu ndéé sanaha-gă, te ni ñà túú tnùhu núu ná ama ní cacu ndíi, te ni ñà túú tnùhu núu ná ama ní xíhí ndíi. Te ndíi-á<sup>n</sup> duca<sup>n</sup>-ni ñi cuu ndíi dútú ñi xíndecu ndíi, te duca<sup>n</sup> sãtnahá-xi cùu Xítohó Jesucristú déhe Yá Ndiöxí chi cuu-gá dútú ni caa ni quíhí<sup>n</sup>.

<sup>4</sup>Te vitna chí cuăha váha cuendá sá ndíi Melquisèdec ní cuu ndíi ñi<sup>n</sup> tée ío ní cuu càhnu ní xíndecu ñuyíú-a, chi ndíi Àbrahám tée ní cuu ñaní tnáhá-ó ñi xíndecu ndéé sanaha ñi quide ndíi úxí xichi nchaa sá ñi níhí ndíi núu ñi nàá ndíi. Te ñi<sup>n</sup> xichi núu ùxí-á<sup>n</sup> ñi sãñaha ndíi xii ndíi Melquisèdec. <sup>5</sup>Te ndíi Moisés ní chídó tnùní ndíi nàcuáa cada nchaa dútú, cue tée ní cuu ñaní tnáhá ndíi Lèví sá cuè tée-á<sup>n</sup> quehe<sup>n</sup>-güedé ñi<sup>n</sup> xichi núu ùxí xichi sá ñihí cue ñáyiú isràél ñáyiú cùu ñaní tnáhá-güedé cuu cuendá-güedé. Te duca<sup>n</sup> quide-güedé cuèi ñaní tnáhá-güedé ndíhí-yu ní cuu ndíi Àbrahám. <sup>6</sup>Te cuèi ñá díú ñaní tnáhá ndíi Melquisèdec cúu ndíi Àbrahám dico ní quehe<sup>n</sup> ndíi Melquisèdec-á<sup>n</sup> ñi<sup>n</sup> xichi núu ùxí xichi nchaa sá ñi níhí ndíi Àbrahám. Te ndíi Melquisèdec-á<sup>n</sup> ñi xícá<sup>n</sup> táhú ndíi núu Yá Ndiöxí cuendá ndíi Àbrahám. Te ñuú-ndíi Àbrahám-á<sup>n</sup> ñi xáha<sup>n</sup> Yá Ndiöxí xii ndíi sá cáda váha ñaha-gă xii ndíi. <sup>7</sup>Te sa cùtnuní iní-ó sã ñuú ñi<sup>n</sup> tée na càcá<sup>n</sup> táhú-dě núu Yá Ndiöxí cuendá ñi<sup>n</sup> ñáyiú, te tée-á<sup>n</sup> cúnùu-gá-dé. <sup>8</sup>Te cue dútú ñáyiú isràél quèhé<sup>n</sup>-güedé ñi<sup>n</sup> xichi núu ùxí xichi nchaa sá ñihí-yu cùu cuendá-güedé, te cue tée-á<sup>n</sup> cuú-güedé. Te núu tütú Yá Ndiöxí càchí-xi sá ndíi Melquisèdec ndécú-ní ndíi, te duca<sup>n</sup> càhá<sup>n</sup>-xi chi ñá túú tnùhu sá ñi xíhí ndíi. <sup>9-10</sup>Te sá dúcá<sup>n</sup> ñi sãñaha ndíi Àbrahám sá ñi nduu táhú ndíi Melquisèdec, te xíá<sup>n</sup> cada iní-ó sã sà ndecu ndíhi ndíi Àbrahám cue ñaní tnáhá ndíi Lèví cue tée cùu dútú, cue tée quèhe<sup>n</sup> ñi<sup>n</sup> xichi núu ùxí xichi nchaa sá ñihí ñáyiú isràél cuèi vátá cácu-gă-güedé. Te cada iní-ó sã tnáhá-güedé ní sáha-güedé ndíi Melquisèdec ñi<sup>n</sup> xichi núu ùxí xichi nchaa sá ñi níhí ndíi Àbrahám núu ñi nàá ndíi. Te duca<sup>n</sup> càda iní-ó chi cue tée-á<sup>n</sup> cúu-güedé ñaní tnáhá ndíi Àbrahám cuèi vátá cácu-gă-güedé dàvá-á<sup>n</sup>.

<sup>11</sup>Te sá cuendá cue dútú cue tée cùu ñaní tnáhá ndíi Lèví ní ngúndecu ndíhi cue ñáyiú isràél tnùhu sá sánú ñichi ñaha xíi-yu nàcuáa cáda-yu cundecú-yu. Te ñaní tnáhá ndíi Àrón cúu cuè dútú-á<sup>n</sup>. Te núu dicó cue dútú-á<sup>n</sup> ní ndàcu-güedé cada-güedé nàcuáa cudù ñáyiú isràél núu Yá Ndiöxí, te ñá túú-gă xíní ñùhu-xi ngúndecu ñngá dútú dàtná ndíi Melquisèdec ní cùu. Te dútú-á<sup>n</sup> ñà túú ní cùu-dé dàtná ní cuu cue ñaní tnáhá ndíi Àrón. <sup>12</sup>Te núu cuè dútú cue tée cùu ñaní tnáhá ndíi Lèví-á<sup>n</sup> ñi ngúndecu ñngá dútú. Te sá dúcá<sup>n</sup> ñi ngúndecu ñngá dútú xíá<sup>n</sup> dacuitíi ñi

xini ñuhu-xi sá dăma năcuăa ndùu tnúhu sá sánú ìchi ñaha xií-yu năcuăa cadă-yu cundecú-yu. **13-14**Te diu-ni cuendá dútú-ă<sup>n</sup> sa nihí-ó tnúhu, te dútú-ă<sup>n</sup> cúu Xítóhó Jesucrístú, te ñá díú ñanı tnáhá ndii Àrón cúú-gă chi ñanı tnáhá ndii Jùdá cúú-gă. Te ncha-a-o tà xiní ndáá-ó să ñanı tnáhá ndii Jùdá cúú-gă, te ndii Moisés ñá túú tnàhí ná ní cächí ndii cuendá cue ñanı tnáhá ndii Jùdá sá cúú-güedě dútú, chi ni ì<sup>n</sup>-güedě ñá túú ní cùu-güedě dútú ní cùu.

**15**Te vitna cùtnuní ndáá iní-ó năcuăa ní cuu, chi Xítóhó Jesucrístú cúú-gă ingá dútú dàtná ní cuu ndii Melquisèdec. **16**Te ñá díú cuendá tnúhu sá sánú ìchi ñaha xii ñáyi-u năcuăa cadă-yu cundecú-yu duca<sup>n</sup> ni cùu-gă dútú, chi ní cuu-gă dútú cuendá sá cúú-gă Yaá cundecu ni caa ni quíhí<sup>n</sup> chi vá í<sup>n</sup> ndùu te ndihi nihnu-gă. **17**Te duha ní xáha<sup>n</sup> Yă Ndiöxí xii-gă:

Yòhó cúú-n dütú dàtná ní cuu ndii Melquisèdec,  
te cundecu-n nchàa nduu ncha-a quíú.

Duha ní xáha<sup>n</sup> Yă Ndiöxí xii-gă. **18**Te xíă<sup>n</sup> nùu ncha-a tnúhu ndéé díhna, tnúhu sá ñí xindecu ndihi cue dútú ñà túú-gă cùnùu-xi vitna chi ñá túú-gă xiní ñuhu-xi te ni ñà túú ñă chindèe ñaha-xi. **19**Te diu-ni tnúhu-á<sup>n</sup> cúú-xí tnúhu sá ñí chídó tnùní ndii Moisés canu ichi ñaha xii ñáyi-u năcuăa cadă-yu cundecú-yu. Te tnúhu-á<sup>n</sup> ñà túú vèdana ni quide-xi năcuăa chindee-xi ñáyi-u cudíú-yu núú Yă Ndiöxí. Dico vitna ní ngúndecu ndihi-o tnúhu ndee ìní sá ïo-gă váha dăcúúxí tnúhu ndéé díhna, chi ndècu ndihi-o Xítóhó Jesucrístú Yaá cúú dütú-ó. Te Yaá-á<sup>n</sup> quidé-gă tnàhá tnúhu-o ndihi Yă Ndiöxí vitna.

**20**Te Yă Ndiöxí ní cáhá<sup>n</sup> ndáá cuiti-gă sá Xítóhó Jesucrístú cuu-gă dútú. **21**Dico ñá túú dùca<sup>n</sup> ní cáhá<sup>n</sup>-gă cuendá cue ñanı tnáhá ndii Lèví cue téé ní cuu dútú, cuèi mei òré ní chisaha-güedě ní cuu-güedě dútú. Te cùtnàhá ní chisaha Xítóhó Jesucrístú cúú-gă dútú, te Yă Ndiöxí ní xáha<sup>n</sup> ndáá cuiti-gă xii-gă, te duha ní xáha<sup>n</sup>-gă:

Yúhú Dútú Ndiöxí càhá<sup>n</sup> ndáá cuiti-í te vá dāmà-í tnúhu càhá<sup>n</sup>-í:  
“Yòhó cúú-n dütú dàtná ndii Melquisèdec,  
te cundecu-n ñè caa ni quíhí<sup>n</sup>.”

Duha ní xáha<sup>n</sup> Yă Ndiöxí xii Xítóhó Jesucrístú. **22**Te Xítóhó Jesucrístú quidé-gă năcuăa cutnùní ndáá iní-ó să Yă Ndiöxí cada-gă ingá núú să váha sá cúú-xí-ó dàtná ní cachí-gă, te xíă<sup>n</sup> cúú-xí să ïo-gă váha dăcúúxí tnúhu ní cáhá<sup>n</sup>-gă ndéé díhna. **23**Te ío cuéhé cue ñanı tnáhá ndii Lèví ní cuu-güedě dútú, te duca<sup>n</sup> cuendá sá ñà túú ní cùdíi-güedě cundecu-güedě chi ní ndihi-güedě ní xíhí. **24**Dico Xítóhó Jesucrístú chi vá cùú-gă, chi cundecu-gă ni caa ni quíhí<sup>n</sup> nùu xíă<sup>n</sup> diu-ni-gă cuu-gă dútú, te vá yòo ì<sup>n</sup>-gă cuu dútú cada núú-gă. **25**Te núu xíă<sup>n</sup> Xítóhó Jesucrístú dăcăcu nihnu ñaha-gă xii nchoo ñáyi-u núú ùhú núú ndàhú, nchoo ñáyi-u sàndáá iní ñáhá xii-gă, te



diu-ni nchoo cùu-o ñáyiú tnàhá tnúhu ndíhi Yá Ndiöxí, te vá íí<sup>n</sup> ndùu-gá te cuíta nihnu-o. Te duca<sup>n</sup> chi Xítohó Jesucrìstú ñá túú xòcuíñí-gá núú Yá Ndiöxí càhá<sup>n</sup> ndàhú-gá cuèndá-ó.

**26**Te Xítohó Jesucrìstú cúu-gă Yaá cúu dütú cúnùu xini ñuhu-o cundecu ndíhi-o, te diu-gá cúu-gă Yaá chíndèe chítúu ñaha xii-o, te cùu-gá Yaá ío quide ndáá núú Yá Ndiöxí, te cùu-gá Yaá cándò canine chi ñá túú tnàhí cuéchi-gá. Te ñá túú tnàhí quide-gá dàtná quidé nchàa cue ñáyiú ndècu ichi cuehé ichi duha, te cùu-gá Yaá ní nucúndecu andíu nùú ndécú Yá Ndiöxí te yàcá<sup>n</sup> táxí tnùní-gá. **27**Te ñá túú quide-gá dàtná ní quide cue dütú ní cunuú ní xíndecu, chi cue dütú-ă<sup>n</sup> íí<sup>n</sup> nduu íí<sup>n</sup> nduu ní xóo cahni-güedé quiti ní xóo nduu táhú Yá Ndiöxí, te díhna-gá cuèndá nchaa cuéchi mee-güedé duca<sup>n</sup> ní xóo cada-güedé te dătnùní duca<sup>n</sup> ní xóo cada tucu-güedé cuèndá nchaa cuéchi ñáyiú. Dico Xítohó Jesucrìstú chi íí<sup>n</sup> xito-ni ní xíhí-gá sá cúu-xí nchàa ñáyiú chi duca<sup>n</sup> ní sani iní-gá, te vá íí<sup>n</sup> ndùu-gá duca<sup>n</sup> càda tucu-gá. **28**Te sá cuèndá nchaa tnúhu ní chídó tnùní ndíi Moisés xíă<sup>n</sup> ní xíndecu cue téé ní cuu dütú cúnùu, te cue téé-ă<sup>n</sup> ní cuu-güedé cue téé yíca cuéchi-xi. Te sátá dúcá<sup>n</sup> ní chídó tnùní ndíi Moisés nàcuáa cada ñáyiú, te ní xica cuehé víhí ndùu te dătnùní ní cáhá<sup>n</sup> ndáá cuíti Yá Ndiöxí sá Dêhe-gá cuu-gá dütú cúnùu. Te Yaá cúu Dêhe-gá-ă<sup>n</sup> ní quide-gá nchaa nàcuáa tàú-xi cunduu, te diu-ni duca<sup>n</sup> càda-gá ni caa ni quíhí<sup>n</sup>.

### Xítohó Jesucrìstú cúu-gă dütú cúnùu

**8** **1**Te Xítohó Jesucrìstú Yaá cúu dütú cúnùu ndecu ndíhi-o cuándaa-gá andíu, te ní ngóo-gá xio cùha Dütú Ndiöxí Yaá ío cúnùu, te tnàhá-gá cúnùu-gá. Te diu cuèndá-a cùu-xi sá ío-gá cúnùu ta cáhá<sup>n</sup>-ndí véxi. **2**Te núú ndécú Yá Ndiöxí cúu-xí nùú íí víhí. Te cada iní-ó sá cúu-xí íí<sup>n</sup> vehe te xíă<sup>n</sup> ndécú Xítohó Jesucrìstú cúu-gă dütú, te vehe-ă<sup>n</sup> ní dácáa mèe Yá Ndiöxí te ñá díú cuè téé ñuyíú-a. **3**Te sá cuèndá nchaa tnúhu ní chídó tnùní ndíi Moisés xíă<sup>n</sup> ní xíndecu cue dütú cúnùu cuèndá sá cáhni-güedé quiti nduu táhú Yá Ndiöxí, te nacani cuèndá-güedé núu-gă nchaa dava-gá sá nihí-güedé nduu táhú-gă. Te xíă<sup>n</sup> nùu dai ní xini ñuhu-xi sá tnàhá Xítohó Jesucrìstú cuáñaha-gă íí<sup>n</sup> sá ndúú táhú Yá Ndiöxí, te táhú-ă<sup>n</sup> cúu-xí mèe-gá chi ní xíhí-gá ní cuu-gá dàtná íí<sup>n</sup> táhú sá cúu-xí Yá Ndiöxí. **4**Te núu ni xíndecu-ni Xítohó Jesucrìstú ñuyíú-a te vá cúu-gă dütú ní cùu, chi sa ndècu cue dütú sãñaha nchàa sá ndúú táhú Yá Ndiöxí dàtná càhá<sup>n</sup> nchaa tnúhu ní chídó tnùní ndíi Moisés. **5**Te nchaa sá quidé cuè dütú ñáyiú isràel nùtnahá-xi luha nchaa sá quidé Xítohó Jesucrìstú Yaá cúu dütú cúnùu ndecu andíu. Te quèe ndáá-xi nàcuáa ní xáha<sup>n</sup> Yá Ndiöxí xii ndíi Moisés cútnàhá tá cùyatni ngúíta ndíi dacàa ndíi vehe-gá, te duha ní xáha<sup>n</sup>-gă: “Ío



váha cada cuendá-n nàcuáa dacàa-n vehe-í dàtná cáá sã ní dánèhé ñáhà-í xii-n xití yucu”, duha ní xáha<sup>n</sup>-gã xii ndíi. <sup>6</sup>Dico vitna chi Xítohó Jesucrístú cúú-gã dútú cúnùu, te ío-gã càhnu nduu chiu<sup>n</sup> quide-gã dàcúxí cuè dútú cue ñáyiú isràél. Te ñiú Xítohó Jesucrístú cúú-gã Yaá quidé tñhá tñúhu-o ndíhi Yá Ndiöxí, te duca<sup>n</sup> chi Yá Ndiöxí ío-gã váha ndùu tñúhu ní cáhá<sup>n</sup>-gã xito cùu uú dàcúxí tñúhu ní cáhá<sup>n</sup>-gã ndéé díhna, te duca<sup>n</sup> ño váha ndùu tñúhu ní cáhá<sup>n</sup>-gã xito cùu uú chi ní cachí-gã sá ñngá núú sã ño-gã váha cada ñaha-gã xii-o vitna.

<sup>7</sup>Te núu nàcuáa ní cachí Yã Ndiöxí cada ñaha-gã xii-o ndéé díhna ni quide-xi nchaá nacuáa tàú-xi cunduu nàcuáa nduu táhú-ó cùndecu váha-o nñú-gã ñá, te ñá túú xini ñuhu-xi cáhá<sup>n</sup> tucu-gã sá cádá-gã ñngá núú sã vãha sá cúú-xí-ó vitna ni cuu. <sup>8</sup>Te Yá Ndiöxí ñá túú ní cùu váha iní-gã núú ñáyiú isràél nñu xíã<sup>n</sup> ní cáhá<sup>n</sup>-gã cuendá-yu, te duha ní cachí-gã:

Yúhú cúú-í Dútú Ndiöxí, te duha ndùu tñúhu na càhá<sup>n</sup>-í: Sáá nduu te cada-í ñngá núú sã vãha sá cúú-xí cuè ñaní tñhá ñáyiú isràél, ndíhi cue ñaní tñhá ndíi Jùdá ñiú-ni ñáyiú isràél.

<sup>9</sup>Te tñúhu sá càhá<sup>n</sup>-í-a ñá túú ñi<sup>n</sup>-ni cuu-xi ndíhi tñúhu sá ñi xáha<sup>n</sup>-í xii cue ñáyiú ní cuu ñaní tñhá-yu ní xíndecu ndéé sanaha càda-í-yu,

te ñiú-ni dàvá-á<sup>n</sup> ñi quide yica-í ní ndeñuhu-í-yu nació<sup>n</sup> Ègiptú, te ñá túú ní cuíni-yu tñí-yu tñúhu ní xáha<sup>n</sup>-í xii-yu cuendá duca<sup>n</sup> càda váha-í-yu,

te xíã<sup>n</sup> nñu ní dáñá ñihnu-í-yu ñá túú-gã ní quide cuendá-í-yu.

<sup>10</sup>Te na sàá nduu te duha ndùu tucu ñngá núú sã vãha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuíni-í cadá-yu, te duca<sup>n</sup> ñi yuhu ni iní-yu cadá-yu.

Te yúhú Yã Ndiöxí quíndaha-í-yu, te mèé-yu cuú-yu ñáyiú cùu cuendá-í.

<sup>11</sup>Te dàvá-á<sup>n</sup> chi ni ñáyiú cùu ndi mèé-yu,

te ni cuè dava-gã ñáyiú vá cùtnúhu tñhá-yu sá nátùha ñahá-yu xii-í,

chi dàvá-á<sup>n</sup> nchaá ñáyiú cundecu ndíhi ñahá-yu xii-í, cuèi ñáyiú cùnuu te cuèi ñáyiú ñá túú cùnuu.

<sup>12</sup>Te dàvá-á<sup>n</sup> cada càhnu iní-í nchaá sá cuèhé sá dúhá quidé-yu,

te vá í<sup>n</sup> ndùu-gã ndacu iní-í nchaá sá quídè-yu.

Duha ní cachí Yã Ndiöxí cuendá ñáyiú isràél. <sup>13</sup>Te sá dúcá<sup>n</sup> ñi cáhá<sup>n</sup> Yã Ndiöxí sá cádá-gã ñngá núú sã vãha sá cúú-xí ñáyiú xíã<sup>n</sup> cùtnùní sá tñúhu sá ñi cáhá<sup>n</sup>-gã díhna ñá túú-gã xini ñuhu-xi. Te cada iní-ó sã tñúhu-á<sup>n</sup>

cúu-xí ì<sup>n</sup> sá nǐ cunaha ndècu te ñá túú-gǎ nándǐhi-xi te cuíta-ná-xi, duca<sup>n</sup> sǎtnahá-xi cùu tnúhu sá nǐ cáhá<sup>n</sup>-gá ndéé díhna.

### Cuendá vehe Yá Ndiöxí

**9** <sup>1</sup>Te tnúhu sá nǐ cáhá<sup>n</sup> Yá Ndiöxí ndéé díhna cùu-xi cuendá nàcuáa cada ñáyiu isràél chiñuhu ñàhá-yu xii-gá, ndihi cuendá vehe-gá caa ñuyúu-a. <sup>2</sup>Te ñáyiu isràél ní dácáã-yu vehe Yá Ndiöxí, te vehe-á<sup>n</sup> nǐ cuu-xi vehe dóó te ní xúhu<sup>n</sup> nehu xití-xi. Te cuàrtú díhna ní xínani-xi cuàrtú ní cuu íí, te xía<sup>n</sup> nǐ xíndecu ì<sup>n</sup> sá ndèé dité-xi sá nǐ cándodó ì<sup>n</sup> caa candíl núú dité-xi, te ní xínutnǐ ì<sup>n</sup> mèsá ní xóo códo pàá ní xóo nduu táhú Yá Ndiöxí. <sup>3</sup>Te cuàrtú cúu ùú ní xínani-xi cuàrtú ní cuu íí víhí-gǎ. <sup>4</sup>Te xití cuàrtú-á<sup>n</sup> nǐ xínutnǐ ì<sup>n</sup> sá nǐ cuáha mee-ni díhú<sup>n</sup> cuàá<sup>n</sup> te núú xǎ<sup>n</sup> ní xóo cahmi-güedé dúsa sá sàhá<sup>n</sup> tnámí. Te diu-ni xía<sup>n</sup> nǐ xíndecu tucu ì<sup>n</sup> càjá ní cuu mee-ni díhú<sup>n</sup> cuàá<sup>n</sup> te xití càjá-á<sup>n</sup> nǐ xúhu<sup>n</sup> ì<sup>n</sup> lítu ní cuáha mee-ni díhú<sup>n</sup> cuàá<sup>n</sup>, te xití lítu-á<sup>n</sup> nǐ xúhu<sup>n</sup> mànáá sá nǐ xóo caxí-yu dàvá-á<sup>n</sup>. Te diu-ni xití càjá-á<sup>n</sup> nǐ xúhu<sup>n</sup> tnudìi ndíi Àrón sá nǐ saa itá-xi, ndihi yúú sǎ nǐ xindeé tnúhu ní cáhá<sup>n</sup> Yá Ndiöxí nàcuáa cada ñáyiu. Te duha ní xínani càjá-á<sup>n</sup>: Càjá sá ñúhú tnúhu ní cáhá<sup>n</sup> Yá Ndiöxí sá cúu-xí ñáyiu, duha ní xínani-xi. <sup>5</sup>Te núú càjá-á<sup>n</sup> nǐ cándodó úú tnàhá sá nǐ cadúha-yu, te xía<sup>n</sup> cáá-xí dàtná cáá espíritú xínú cuèchi núú Yá Ndiöxí. Te cuendá úú xía<sup>n</sup> ní cutnùní iní-yu sá ïo càhnu cuu Yá Ndiöxí, te sá nǐ cadúha-yu-á<sup>n</sup> ndèé ndíxí<sup>n</sup>-xi, te ndíxí<sup>n</sup>-xi-á<sup>n</sup> dǎhu-xi xio xio núú quidé càhnu iní Yá Ndiöxí nchaa yíca cuèchi ñáyiu, dico vá cúu-gǎ cáhá<sup>n</sup>-í cuendá nchaa dava-gá xǎ<sup>n</sup> vitna.

<sup>6</sup>Te nchaa xía<sup>n</sup> ní xíndecu xití vehe Yá Ndiöxí, te cue dútú nǐ xóo quíhu-güedé ì<sup>n</sup> nduu ì<sup>n</sup> nduu xití cuàrtú díhna ní xóo cada-güedé nàcuáa tàú-güedé cada-güedé sá cúu-xí Yá Ndiöxí. <sup>7</sup>Te cuàrtú cúu ùú-á<sup>n</sup> chi mee-ni dútú cúnùu ní xóo quíhu-dé ì<sup>n</sup> xito-ni ndi tnahá cuía. Te ndi tnahá òrè duca<sup>n</sup> nǐ xóo quíhu dútú cúnùu-á<sup>n</sup> te ní xóo canehe-dé níñí nǐ xóo quíhu ní xóo nduu táhú Yá Ndiöxí. Te duca<sup>n</sup> nǐ xóo cada dútú-á<sup>n</sup> cuendá sá Yá Ndiöxí cada càhnu iní-gá nchaa yíca cuèchi mee-dě, ndihi nchaa yíca cuèchi ñáyiu. <sup>8</sup>Te sá dúcá<sup>n</sup> mèe-ni dútú cúnùu ní xóo quíhu-dé xití cuàrtú ní cuu íí-gǎ-á<sup>n</sup>, xía<sup>n</sup> Espíritú Yá Ndiöxí quidé-xí cùnùní iní-ó sǎ nǐni duca<sup>n</sup> ní xíndecu vehe-á<sup>n</sup> nǐ xóo cadá-yu nàcuáa ní xóo cúñaha Yá Ndiöxí cadá-yu. Te xía<sup>n</sup> cùnùní sá vǎtá sàá-gá nduu cǎhá<sup>n</sup> ndihí-yu Yá Ndiöxí nàcuáa tàú-xi cunduu. <sup>9</sup>Te sá dúcá<sup>n</sup> nǐ xíndecu vehe-á<sup>n</sup>, ndihi sá dúcá<sup>n</sup> ní xóo cada nchaa cue dútú-á<sup>n</sup>, xía<sup>n</sup> cùnùní iní-ó nàcuáa quide Yá Ndiöxí vitna, chi nchaa quití ní xóo cahni cue dútú-á<sup>n</sup> nǐ xóo nduu táhú Yá Ndiöxí, ndihi nchaa dava-gá sá nǐ xóo nduu táhú-gǎ ñá túú ní quide-xi nàcuáa nduu ndoo nduu nine iní cue ñáyiu nàcuáa cutnùní iní-yu sá ñà túú-gǎ cuèchi-yu ndècu núú Yá Ndiöxí. <sup>10</sup>Te sá dúcá<sup>n</sup> nǐ xóo cada nchaa dútú-á<sup>n</sup>

nĩ níhí tnáhá-xí ndìhi nchaa tnúhu sá dánèhé ñáhá xii ñáyiu ná cúú sã cáxí-yu ndìhi ná cúú sã cúú còhó-yu ndìhi nàcuáa ndàhá-yu. Te tnúhu-á<sup>n</sup> nĩ cuu-xi mee-ni sã nĩ sanu ichi ñaha xii-yu nàcuáa cundecú-yu ñuyíú-a. Te tnúhu-á<sup>n</sup> nĩ nàndíhi-xi ndéé ní sáá nduu nĩ nadama Yá Ndiöxí tnúhu-á<sup>n</sup> cuèndá sá vã dúcá<sup>n</sup>-gã cadá-yu cundecú-yu.

**11**Te Xítohó Jesucrístú ní quixi-gá ñuyíú-a, te diu-gá cúú-gã Yaá cúú dütú cúnùu, te xíã<sup>n</sup> nũu quide-gá nchaa sá vãha sá cúú-xí-ó. Te vitna ní nucúndecu-gá núú ïo vii ío váha càa, te núú ndécú-gã-á<sup>n</sup> ñà túú cùu-xi ì<sup>n</sup> vehe sá nĩ dácáá cuè téé ñuyíú-a. **12**Te cada iní-ó sã Xítohó Jesucrístú cuánguihu-gá xití cuàrtú núú nĩ cuu íí víhí dàtná ní xóo cada dütú cúnùu ní xíndecu ndéé sanaha, chi ní nucúndecu-gá núú ndécú Yã Ndiöxí. Dico ñá túú ni quide-gá dàtná ní xóo cada dütú cúnùu ní xíndecu ndéé sanaha, chi dütú-ã<sup>n</sup> òré ní xóo quíhu-dé xití cuàrtú ní cuu íí-gã-á<sup>n</sup>, te ní xóo canehe-dé níñí chivá ndìhi níñí chěhlu ní xóo quíhu. Dico Xítohó Jesucrístú chi níñí méé-gã ní sati ní xíhí-gá núú cùrúxí, te xíã<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núú ndécú Yã Ndiöxí. Te sá dúcá<sup>n</sup> nĩ quide-gá xíã<sup>n</sup> ní naníhí tàhú-ó. **13**Te nchaa ñáyiu ní xóo cada nàcuáa vá cúú-gã-yu ñáyiu ní cuu íí, ñáyiu-á<sup>n</sup> nĩ xóo códó ñáhá cuè dütú níñí ndicutu, ndìhi níñí chivá, ndìhi yáá cùnù chěhlu quití sàhni-güedé cuèndá nduu íí tucú-yu. **14**¡Dico níñí Xítohó Jesucrístú chi ío-gá nàndíhi-xi sá cúú-xí nchò ñáyiu xíndecu vitna! Te cuèndá níñí-gã-á<sup>n</sup>, chi Espíritú Yã Ndiöxí sá ndécú nchàa nduu nchaa quíú nĩ cuu ì<sup>n</sup>nuu-xi ndìhi Xítohó Jesucrístú sá cúú cùú-gá cuèndá cuu-gá dàtná ì<sup>n</sup> táhú sã cúú-xí Yã Ndiöxí cuèi cùu-gá Yaá ñá túú tnàhí cuéchi-xi, te ní sati níñí-gã te ní xíhí-gá. Te cuèndá xíã<sup>n</sup> ní cutnùnì iní-ó sã Yã Ndiöxí ní quide càhnu iní-gá nchaa sá ñà túú vãha ní quide-o, te ní nduu ndoo ní nduu nine iní-ó. Te duca<sup>n</sup> nĩ nduu ndoo ní nduu nine iní-ó cuèndá sá ndácú-ó cunu cuechi-o núú Yã Ndiöxí Yaá ndécú nchàa nduu nchaa quíú.

**15**Te Xítohó Jesucrístú ní quide ndáá-gá núú Yã Ndiöxí cuèndá cue ñáyiu ndècu ñuyíú-a. Te cuèndá xíã<sup>n</sup> Yã Ndiöxí cada-gá ingá núú sã vãha sá cúú-xí-yu dàtná ní cachí-gá, te duca<sup>n</sup> càda-gá sá cuèndá nchaa ñáyiu ní cáhá<sup>n</sup>-gá cundecu ndìhi-gá, chi ñáyiu-á<sup>n</sup> nduu táhũ-yu cundecu ndìhi váha ñàhá-yu xii-gá ni caa ni quíhí<sup>n</sup> chi duca<sup>n</sup> nĩ cachí-gá, te duca<sup>n</sup> chi Xítohó Jesucrístú ní xíhí-gá núú cùrúxí cuèndá sá Yã Ndiöxí cada càhnu iní-gá nchaa yíca cuéchi-yu, nchaa cuéchi sá nĩ quidé-yu cùtnàhá ní cunuu tnúhu sá nĩ cáhá<sup>n</sup>-gá díhna. **16**Te nchoo xíní-ó sã nũu ì<sup>n</sup> téé na càdúha ì<sup>n</sup> tutú nàcuáa cada ñáyiu dàcáhũ-yu nchaa sá ndécú ndìhi-dé, te tutú-á<sup>n</sup> xíní ñũhu-xi ndéé ná yãha nduu cùú-dé. **17**Te ñá túú tàú-xi cada ñáyiu nàcuáa càhá<sup>n</sup>-xi núú tütú-á<sup>n</sup> nini ndècu téé ní cadúha, dico sátá ná yãha cuú-dé te cadá-yu nàcuáa càhá<sup>n</sup>-xi. **18**Te cuèi tnúhu ní cáhá<sup>n</sup> Yã Ndiöxí ndéé díhna

nàcuáa cada váha-gá ñáyi, te ñi-ni ndihi níñí ñi cundáa-xi chi ní sahani-güedé quiti te ní sati níñí-güedi. **19**Te ndí Moisés ní cáhá<sup>n</sup> ndodo ndí núu nchàa ñáyi nàcuáa ní cachí Yá Ndiöxí cada-yu, te nàcuáa-ni ndúu tnúhu ní chídó tnùní ndí núu tütú ndí ní cáhá<sup>n</sup> ndí, te ní dácá ndí ndute níñí chēhlu ndihi níñí chivá lihli, te ní quehe<sup>n</sup> ndí ñi<sup>n</sup> dité yutnu nani hisópó ndihi luha idi ticuèhé, te ní chindóyo ndí níñí-á<sup>n</sup>. Te ní sódo ndí núu tütú ndéé tnúhu Yá Ndiöxí sá ñi chídó tnùní ndí-á<sup>n</sup>, te tnàhá cue ñáyi xñdecu-á<sup>n</sup> ñi chúcú ndí. **20**Te ní xáha<sup>n</sup> ndí Moisés xií-yu: “Cuèndá níñí-a ní cundáa sá Yá Ndiöxí cada ñaha-gá xii-ndo sá váha chi duca<sup>n</sup> ñi cachí-gá cada-gá sá cúu-xí-ndó”, duha ní xáha<sup>n</sup> ndí xií-yu. **21**Te ñi-ni duca<sup>n</sup> ñi quide tucu ndí ní chúcú ndí níñí vehe-gá ndihi nchaa sá nándíhi-güedé òré chíñùhu-güedé Yá Ndiöxí ndécú xítí vehe-gá-á<sup>n</sup>. **22**Te tnúhu ní chídó tnùní ndí Moisés càchí-xi sá méé-ní ñíñí chucu-güedé nchaa sá cānehe chiñ<sup>n</sup>-güedé òré chíñùhu-güedé Yá Ndiöxí, te sacú-nā te ndihi ndoo nchaa xiā<sup>n</sup> chucu-güedé níñí ni cūu. Te dacuití ñi xini ñuhu-xi sá cātí ñíñí cuèndá duca<sup>n</sup> càda cahnu iní Yá Ndiöxí nchaa yíca cuèchi ñáyi.

**Xítohó Jesucristú ní xíhí-gá núu cùrúxí cuèndá sá vā cùndècu-gá cuéchi-o  
núu Yá Ndiöxí**

**23**Te sá cuèndá sá ñi xíhí Xítohó Jesucristú núu cùrúxí, xiā<sup>n</sup> ñā túu-gā cuéchi-o ndècu núu Yá Ndiöxí. Te cuèndá nchaa sá ñi xíhi xítí vehe-gá sá ñi dácáá ñáyi israhél xiā<sup>n</sup> cùtnùní iní-ó nàcuáa quide-xi núu ndécú-gā. Te dacuití ñi xini ñuhu-xi sá cáhñí-güedé cue quiti ní cachí Yá Ndiöxí cuèndá nduu í nchaa sá ñi xíhi xítí vehe-gá-á<sup>n</sup>. Te cuèi duca<sup>n</sup> ñi sahani-güedé cue quití-á<sup>n</sup> dico ñā túu ní quide-xi nacuáa ngúndecu váha-o núu Yá Ndiöxí. Dico Xítohó Jesucristú ní xíhí-gá, te sá ñi xíhí-gá xiā<sup>n</sup> ní quide-gá nàcuáa ngúndecu váha-o núu Yá Ndiöxí. **24**Te Xítohó Jesucristú cuánda-gá andíu núu ndécú Yá Ndiöxí cáhá<sup>n</sup> ndàhú-gá cuèndá-ó, te Xítohó Jesucristú chi ñā díu ñi<sup>n</sup> vehe ní dácáá cuè téé ñuyú-a cuánguihu-gá. Te vehe Yá Ndiöxí sá ñi dácáá cuè ñáyi israhél ñuyú-a ndéé sanaha, ndihi nchaa nàcuáa ní xóo cada-güedé xítí vehe-gá-á<sup>n</sup> xiā<sup>n</sup> cùtnùní iní-ó nàcuáa quide-xi núu ndécú-gā. **25**Te dútú cùnùu núu ñáyi israhél ní xóo quíhu-dé núu cuíá núu cuíá xítí cuártú ní cuu í víhí-gā-á<sup>n</sup>, te ní xóo canehe-dé níñí ñi xóo quíhu xítí cuártú-á<sup>n</sup> dico ñā díu ñíñí méé-dé. Dico Xítohó Jesucristú chi ñā túu dùca<sup>n</sup> ni quide-gá chi ñi<sup>n</sup> xito-ni ní sati níñí-gā te ní xíhí-gá. **26**Chi núu ni xíhí-gá nuu núu te ndéé cùtnàhá ní ngáva ñuyú duca<sup>n</sup> ngüita-gá cada-gá ní cūu, te vitna ta ndíhi nduu cuáhá<sup>n</sup> ní quixi-gá ñuyú-a ní xíhí-gá ñi<sup>n</sup> xito-ni cuèndá cuu-gá dàtná ñi<sup>n</sup> táhu sá cúu-xí Yá Ndiöxí, te duca<sup>n</sup> ñi quide-gá cuèndá sá vā cùndècu-gá cuéchi ñáyi núu Yá Ndiöxí. **27**Te nchoo cuè

ñáyiú ñuyíú-a chi ì<sup>n</sup> xito-ni cuú-ó te dătnùní duca<sup>n</sup> te cada ndáá Yă Ndiöxí cuéchi-o. <sup>28</sup>Te duca<sup>n</sup> sătnahá-xi cùu Xítóhó Jesucristú chi ì<sup>n</sup> xito-ni ní xíhí-gá cuèndá sá vă cúndècu-gá cuéchi ñáyiú núú Yă Ndiöxí, te duca<sup>n</sup> nǐ cuu ní xíhí-gá chi mee-gă duca<sup>n</sup> nǐ cachí-gá cunduu. Te quixi tucu Xítóhó Jesucristú ñuyíú-a dico ñá díú-gă sá cádá-gă cuèndá sá vă cúndècu-gá cuéchi ñáyiú núú Yă Ndiöxí, chi quixi-gá nacuaca-gá nchaa ñáyiú ndètu ñaha xii-gá cuèndá cundecú-yu ndihi-gá nǐ caa nǐ quíh<sup>n</sup>.

**10** <sup>1</sup>Te nchaa tnúhu ní xáha<sup>n</sup> ndǐ Moisés xii ñáyiú isràél cadá-yu, nchaa tnúhu-á<sup>n</sup> nǐ quide-xi ní cutnùní luha iní-yu nàcuáa cada Yá Ndiöxí cada váha ñaha-gă xii-o vitna. Dico ñá díú mèi nacuáa ní xáha<sup>n</sup> ndǐ Moisés xii ñáyiú quide Yá Ndiöxí vitna chi dăma quide-gá. Te nchaa tnúhu ní cáhá<sup>n</sup> ndǐ Moisés ñá túú ní ndàcu-xi cada-xi nacuáa cundáá nchaa ñáyiú tùha ñaha xii Yá Ndiöxí cuèi ní xóo cahni-güedé quiti ní xóo nduu táhú-gă núú cuíá núú cuíá. <sup>2</sup>Te núú dicó sá nǐ xóo cahni-güedé quiti ní xóo nduu táhú Yă Ndiöxí ní quide-xi nacuáa nduu ndoo nduu nine iní cue ñáyiú, te vá cáhni-gă-güedé cue quiti-á<sup>n</sup> nduu táhú-gă ní cùu, te duca<sup>n</sup> te cutnùní iní-yu sá ñà túú-gă cuéchi-yu ndècu núú Yă Ndiöxí ní cùu. <sup>3</sup>Te sá dúcá<sup>n</sup> nǐ xóo cahni-güedé quiti ní xóo nduu táhú Yă Ndiöxí núú cuíá núú cuíá, xiă<sup>n</sup> ní xóo ndacu iní cue ñáyiú nchaa sá cuèhé sá dúhá nǐ xóo cadá-yu. <sup>4</sup>Te duca<sup>n</sup> chi níñí ndicutu-á<sup>n</sup> ndihi níñí chivá-á<sup>n</sup> ñà túú ní xóo ndacu-xi cada-xi nàcuáa vá cúndècu cuéchi-yu núú Yă Ndiöxí.

<sup>5</sup>Te xiă<sup>n</sup> nùu cútnàhá ní quexìo Xítóhó Jesucristú ñuyíú-a ní xáha<sup>n</sup>-gă xii Yá Ndiöxí:

Yòhó Tătà-í, ñá túú ndùu vétú váha iní-n să sáhní-güedě quiti ndùu táhú-n,  
te ni ñà túú ndùu vétú váha tucu iní-n cuèndá nchaa dava-gá sá táxi-güedě ndúú tǎhú-n,  
núú xiă<sup>n</sup> ní quide túha-n yiqui cuñú-í cuèndá yúhú cuú-í te nduu táhú ñáhá-n xii-í.

<sup>6</sup>Te ni ñà túú ndùu vétú váha iní-n cuèndá quiti sàhmi-güedé ndúú tǎhú-n te ni ñà túú ndùu vétú váha iní-n cuèndá nchaa dava-gá sá táxi-güedě ndúú tǎhú-n cuèndá sá vă cúndècu-gá cuéchi ñáyiú núú-n.

<sup>7</sup>Núu xiă<sup>n</sup> yúhú ní cachí-í xii yòhó Tătà-í Dútú Ndiöxí sá yúhú véxi-í ñuyíú-a cada-í nchaa sá cuiní-n càda-í dătná yódó tnùní cuèndá-í núú tütú-n.

Duha ní xáha<sup>n</sup> Xítóhó Jesucristú xii Tătá-gă Dútú Ndiöxí. <sup>8</sup>Te Xítóhó Jesucristú díhna-gá ní xii-gá Yă Ndiöxí Yaá cúu Tătá-gă: “Yòhó Tătà-í ñà túú ndùu vétú váha iní-n cuèndá quiti sàhmi-güedé ndúú tǎhú-n, ndihi cuèndá quiti sàhmi-güedé ndúú tǎhú tucu-n cuèndá sá vă cúndècu-gá



cuéchi ñáyiú núú-n, ndihi cuendá nchaa dava-gá táhú sã táxí-güedë xii-n ñà túú ndùu vétú váha iní-n cuendá nchaa xiã<sup>n</sup>”, duha ní xáha<sup>n</sup> Xítohó Jesucrístú xii Tãtã-gã Dútú Ndiöxí. Te duca<sup>n</sup> ñí xáha<sup>n</sup>-gã cuëi núú tütú ndíi Moisés yódó tnùní sá dúcá<sup>n</sup> càda-güedé. <sup>9</sup>Te sãtã dúcá<sup>n</sup> te ní xáha<sup>n</sup> tucu-gá xii Tãtã-gã Dútú Ndiöxí: “Yòhó Tãtã-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuiní-n”, duha ní xáha<sup>n</sup>-gã xii Tãtã-gã. Te sã dúcá<sup>n</sup> ñí cãhá<sup>n</sup> Xítohó Jesucrístú xiã<sup>n</sup> ní cutnùní sã ñà túú-gã xíní ñùhu-xi duca<sup>n</sup> cada-güedé cahni-güedé nchaa quití-á<sup>n</sup>, te duca<sup>n</sup> chi mee Xítohó Jesucrístú ní xíhí-gá ní cuu-gá dàtná ì<sup>n</sup> táhú sã cúú-xí Yã Ndiöxí, te duca<sup>n</sup> ñí cuu chi duca<sup>n</sup> tnàhí ní cachí Yã Ndiöxí cunduu. <sup>10</sup>Te Xítohó Jesucrístú ní quide-gá nàcuáa ní cuiní Yã Ndiöxí cada-gá, chi ní xíhí-gá núú cùrúxí chi duca<sup>n</sup> ñí cuiní méé-gã cunduu, te ì<sup>n</sup> xito-ni ní xíhí-gá sã cuendá nchaa ñáyiú, te cuendá xiã<sup>n</sup> ñùu ndècu yíñuhu-o núú-gã vitna.

<sup>11</sup>Te cue dútú ñáyiú isràèl chi ì<sup>n</sup> nduu ì<sup>n</sup> nduu ní xóo cahni-güedé quití ní xóo nduu táhú-gã, te ñà túú ní dàma-güedé nàcuáa ní xóo cada-güedé. Te nchaa sã ñí xóo cada-güedé-á<sup>n</sup> ñà túú ní quide-xi nacuáa vá cùndècu-gá cuéchi ñáyiú núú Yã Ndiöxí. <sup>12</sup>Dico Xítohó Jesucrístú ní cachí-gá sã cúú cùú-gá, te ní xíhí-gá núú cùrúxí cuendá nchaa yícã cuéchi nchaa nchoo ñáyiú ndècu ñuyíú-a. Te sãtã dúcá<sup>n</sup> te dàtnùní ní ngóo-gá xio cùha Dútú Ndiöxí táxí tnùní-gá, te vá í<sup>n</sup> ndùu ì<sup>n</sup> quíú-gã te cuú-gá. <sup>13</sup>Te diu-ni xiã<sup>n</sup> cundecu-gá cundetu-gá ndéé sáá nduu cànehe nchaa sã cúú ùhú iní ñáhã xìi-gá sã yíñùhu núú-gã. <sup>14</sup>Te cuendá sã ñí xíhí Xítohó Jesucrístú ì<sup>n</sup> xito-ni xiã<sup>n</sup> ní cuu-gá dàtná ì<sup>n</sup> táhú sã cúú-xí Yã Ndiöxí, xiã<sup>n</sup> ní quide-xi sã ncháá ñáyiú cùu cuendá-gá ñà túú-gã ná cumání-yu núú-gã ñi caa ñi quíhí<sup>n</sup>. <sup>15</sup>Te mee Espíritú Yã Ndiöxí càhá<sup>n</sup> ndáá-xi nàcuáa ní cãhá<sup>n</sup>-gã cuendá-ó, te duha ní cãhá<sup>n</sup>-gã:

<sup>16</sup>Sáá nduu te cada-í nchaa ñáyiú nàcuáa na càhá<sup>n</sup>-í-a,  
te cada-í nàcuáa cutnùní iní-yu tnúhu sã dánèhé-í-yu tnúhu sã  
cánúichi ñaha xií-yu nàcuáa cadá-yu cundecú-yu,  
te cada tucu-í sã tní-yu nchaa tnúhu-á<sup>n</sup>.

Duha ní cachí-gá. <sup>17</sup>Te ní cachí tucu-gá:

Te vá í<sup>n</sup> ndùu ì<sup>n</sup> quíú-gã ndacu iní-í sã quidé sàá iní-yu tnúhu-í,  
te ñi vá í<sup>n</sup> ndùu ì<sup>n</sup> quíú-gã te ndacu iní-í nchaa sã cuèhé sã dúhá  
quidé-yu.

Duha ní cãhá<sup>n</sup> Yã Ndiöxí càchí Espíritú-gá. <sup>18</sup>Te sã dúcá<sup>n</sup> quide cahnu iní Yã Ndiöxí nchaa cuéchi-o, núú xiã<sup>n</sup> ñà túú-gã xíní ñùhu-xi cuú quití nduu táhú-gã cuendá nchaa sã cuèhé sã dúhá quide-o.

### Tàú-ó sã tnàhá tnúhu-o ndíhi Yá Ndiöxí

<sup>19</sup>Te cue dútú ñí xóo cunuu ñùú ñáyiú isràèl cue téé-á<sup>n</sup> ñí xóo quíhu-güedé xití cuàrtú ní cuu íí víhí-gã. Dico nchoo cuè ñáyiú ndècu ichi



Xítohó Jesucristú vitna tàú-ó sã nì yuhu nì iní-ó tnàhá tnúhu-o ndìhi Yá Ndiöxí. Te cuu tnahá tnúhu-o ndìhi-gá chi Xítohó Jesucristú ní sati níñí-gã te ní xíhí-gá núú cùrúxí. **20**Te cada iní-ó sã dõó sã nì xíndedí nàcuáa ní xóo quíhu-güedé xití cuàrtú ní cuu íí víhí-gã-á<sup>n</sup> nì xócuñí, te duca<sup>n</sup> càda iní-ó chi Xítohó Jesucristú ní xíhí-gá cuèndá nchoo ñhí-ó nàcuáa cada-o ngündecu váha-o sã cúú-xí-gã. **21**Te ñu-gá cúú-gã Yaá cúú dütú-ó, te ñu-gá cúú-gã Dütú cùnùu ndecu-gá núú ndécú Yã Ndiöxí. **22**Núu xíã<sup>n</sup> xíní ñùhu-xi sá ïo tnahá tnúhu-o ndìhi Yá Ndiöxí, te vá cání ñ<sup>n</sup> caní úú iní-ó, te ío váha quindáá iní-ó-gã chi ñu-gá ní ndada ndoo ní ndada nine-gá iní-ó cuèndá nchoo cùnuní iní-ó sã ñà túú-gã cuéchi-o ndècu núú-gã. Te ní sandute-o cuèndá sá dúcá<sup>n</sup> nì nduu ndoo ní nduu nine iní-ó. **23**Te nchoo càhá<sup>n</sup> ndáá-ó sã ndécú ndìhi-o tnúhu ndee ñí sá ndúú tãhú-ó cùndecu ndìhi-o Yá Ndiöxí, te xìni ñuhu-xi sá vã dáñá ndèé-ó càchicú<sup>n</sup> nihnu-o tnúhu ndee ñí-á<sup>n</sup> chi Yá Ndiöxí cada-gá nàcuáa ní cachí-gá sá cúú-xí-ó. **24**Te xìni ñuhu-xi cuhu<sup>n</sup> iní tnáhá-ó te chindee tnàha-o nacuáa duca<sup>n</sup> cùu iní tnáhá-gã-ó, te cada-o mèe-ni sá vãha. **25**Te nchoo vã dáñá ndèé-ó nàtacá-ó núú dácuaàha-o tnúhu Yá Ndiöxí, te vá cadá-ó dàtná xiquide davá-yu ñà túú-gã cuíní-yu quixí-yu núú dácuaàha-o tnúhu-gá. Chi xìni ñuhu-xi sá cuãha tnàha-o tnúhu ndee ñí canchicú<sup>n</sup> nihnu-o ìchi-gá, te uu<sup>n</sup>-gá duca<sup>n</sup> tàú-xi cada-o vitna ta cuyatni nduu quixi tucu Xítohó Jesucristú ñuyú-a.

**26**Te cue ñáyiu sa ní tecú tnùní nàcuáa càhá<sup>n</sup> tnúhu Yá Ndiöxí te núu na ngüita-yu ñucùu<sup>n</sup> cadá-yu nándi sá cuèhé sá dúhá, te àú<sup>n</sup> nã cuu ní xíhí Xítohó Jesucristú cuèndá-yu, te ni vã yõo ñ<sup>n</sup>-gá cuú cuèndá sá vã cùndècu-gá cuéchi-yu núú Yã Ndiöxí. **27**Te núu duca<sup>n</sup> na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yã Ndiöxí xií-yu. Chi nchaa ñáyiu cùu úhú iní ñáhá xii-gá daquìhí<sup>n</sup> ñáhá-gã xií-yu núú ñùhú núú càyú núú ïo ndohó-yu. **28**Te nchaa ñáyiu ní xóo daquèe tñhú tnúhu ní cáhá<sup>n</sup> ndíi Moisés, te núu ndècu úú àdi úní ñáyiu càhá<sup>n</sup> ndáá sá dúcá<sup>n</sup> nì dáquèe tñhú-yu tnúhu ní cáhá<sup>n</sup> ndíi, te vá yõo nì xóo cundàhú iní ñáhá xii nchaa ñáyiu duca<sup>n</sup> nì xóo cada chi ní xóo cahni ñaha-güedè. **29**Te núu duca<sup>n</sup> nì ndoho cue ñáyiu duca<sup>n</sup> nì dáquèe tñhú tnúhu ní cáhá<sup>n</sup> ndíi Moisés-á<sup>n</sup>, te uu<sup>n</sup>-gá ndoho cue ñáyiu dàquee tihú ñáhá xii Xítohó Jesucristú Yaá cúú Dèhe Yá Ndiöxí ñu-ni ñáyiu càchí sá ñà túú nàndíhi níñí-gã. Te níñí-gã-á<sup>n</sup> nì sati, te ní xíhí-gá, te duca<sup>n</sup> nì cuu cuèndá cada Yá Ndiöxí ingá núú sã vãha sá cúú-xí nchòo ñáyiu ndècu ñuyú-a dàtná ní cachí-gá cada-gá. Te ñu-ni cuèndá níñí-gã-á<sup>n</sup> nì nduu ndoo ní nduu nine iní cue ñáyiu-á<sup>n</sup> ní cùu, te ñu-ni ñáyiu-á<sup>n</sup> càhá<sup>n</sup> úhú-yu Espíritú Yã Ndiöxí sá chíndèe chitúu ñaha xii-o. **30**Te nchoo sà naha-o sá Yã Ndiöxí càchí-gá ñ<sup>n</sup> xichi núú tütú-gá: “Yúhú cada-í te nacháhu ñáyiu nchaa sá quídè-yu, te

duha càhá<sup>n</sup>-í chi nachinaa-í cuendá nchaá sá quídě-yu-á<sup>n</sup>”, duha càchí-gá. Te sa nàha tucu-o nacuáa càhá<sup>n</sup>-xi núú tütú-gá núú càchí-xi: “Yá Ndiöxí cada ndáá-gá cuendá nchaá sá quidé ñáyiú cùu cuendá-gá”, duha càchí-xi núú tütú-gá. <sup>31</sup>Te ío ndàhú ndoho cue ñáyiú na dándoho ñaha Yá Ndiöxí, te diu-gá cúú-gă Yaá cúnùu nchaá nduu nchaá quíú!

<sup>32</sup>Te chí dándacu iní nàcuáa ní quide-ndo cùtnàhá vitna cuu saa ní tecú tnùní-ndó tnùhu Yá Ndiöxí, chi dává-á<sup>n</sup> ñí quide càhnu iní-ndó cuéi nándi sá ñí yáha-ndo cuendá-gá. <sup>33</sup>Te dava-ndo ñí quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáhă<sup>n</sup>-yu xii-ndo. Te dava-ndo ñí cuyii-ni-ndo ñí xíndecu ndìhi tnàha-ndo cuéi nándi ní ndoho dava-gá-ndó. <sup>34</sup>Te ní cundàhú iní-ndó cuè ñáyiú yìhi vecaá, te cuéi ní quendeé ñáyiú sá ndécú ndìhi-ndo dico ñá túú ní ndìhú iní-ndó chi ní cudíí-ni iní-ndó. Te duca<sup>n</sup> ñí quide-ndo chi sa nàha-ndo sá ndúú tǎhú-ndó sǎ ïo-gá váha, te xiǎ<sup>n</sup> cundecu ndìhi-ndo ñí caa ñí quíhí<sup>n</sup>. <sup>35</sup>Te xiǎ<sup>n</sup> vá dáñá ndèé-ndó quèndáá iní-ndó nàcuáa ní cachí Yǎ Ndiöxí cada ñaha-gă xii-ndo, chi sáá nduu te ío váha cada ñaha-gă xii-ndo. <sup>36</sup>Te nchòhó xíní ñùhu-xi ío cada ndee iní-ndó càda-ndo nchaá nacuáa càhá<sup>n</sup> Yǎ Ndiöxí, te duca<sup>n</sup> te nduu táhú-ndó sǎ ñí cachí-gá nduu táhú-ndó cùndecu ndìhi-ndo ñí caa ñí quíhí<sup>n</sup>. <sup>37</sup>Te Yá Ndiöxí càchí-gá núú tütú-gá:

Ta cùyatni víí-ñǎ nduu quixi Yaá quixi ñuyíú-a, te vá cùyàa-gá.

<sup>38</sup>Te nchaá ñáyiú cùndáá núú-í ñá túú dàña ndeé-yu sàndáá iní ñáhă-yu xii-í,  
te cuendá xiǎ<sup>n</sup> cundecu-ní-yu ichi-í,  
dico núu na dàñá-yu ichi-í te vá cúú vǎha iní-í núú-yu.

Duha càchí Yǎ Ndiöxí núú tütú-gá.

<sup>39</sup>Dico nchoo chi ñá túú cùu-o ñáyiú duca<sup>n</sup> xíquide dàñá-ó ìchi Yá Ndiöxí, chi cùu-o ñáyiú nchìcú<sup>n</sup> nihnu-ni sàndáá iní-ó-gă, te sá dúcá<sup>n</sup> te nduu táhú-ó cùndecu-o ndìhi-gá ñí caa ñí quíhí<sup>n</sup>, te ñá túú cùu-o ñáyiú dàña nihnu ichi-gá te xíta nihnú-yu.

### Ñáyiú sàndáá iní ñáhá xii Yá Ndiöxí

**11** <sup>1</sup>Te núu sàndáá ndisa iní-ó Yǎ Ndiöxí te duca<sup>n</sup> cùtnuní ndáá iní-ó sǎ ñihí-ó sǎ cuíní-ó núú-gă. Te núu sàndáá iní-ó-gă te duca<sup>n</sup> cùtnuní ndáá tucu iní-ó sǎ càhá<sup>n</sup> ndáá-gá cuendá nchaá sá ñà túú xíní-ó. <sup>2</sup>Te duca<sup>n</sup> ñí quide ñáyiú ní xíndecu ndéé sanaha ío ní sàndáá iní-yu Yá Ndiöxí te xiǎ<sup>n</sup> núú ío váha ní cuu iní ñáhá-gă xií-yu.

<sup>3</sup>Te núu nchoo sàndáá ndisa iní-ó Yǎ Ndiöxí te cùtnuní ndáá iní-ó sǎ sǎ cuendá tnúhu ní cáhá<sup>n</sup>-gá ní cuáha andiú ndìhi ñuyíú-a. Te cùtnuní iní-ó sǎ ñà díú sǎ cuendá ìí<sup>n</sup> sá tǔu ndèhe-o ío ñuyíú-a ní cuáha andiú ndìhi ñuyíú-a.

<sup>4</sup>Te ndíi Àbél ío ní sándáá iní ndíi Yá Ndiöxí nũu xíã<sup>n</sup> ío-gá ní cuu iní-gá sá nĩ sãñaha ndíi ní nduu táhú-gã dàcúúxí sã nĩ sãñaha ndíi Càin xii-gá ní nduu táhú-gã. Te ndíi Àbél-á<sup>n</sup> nĩ cutnùní iní ndíi sá nĩ cudìu ndíi núú Yã Ndiöxí cuèndá sá nĩ quehe<sup>n</sup> cuèndá-gá sá nĩ sãñaha ndíi ní nduu táhú-gã. Te cuèi ñá túú-gã ndíi ndècu ñuyíú-a dico yòdo tnuní sá nĩ sándáá iní ndíi Yá Ndiöxí cuèndá duca<sup>n</sup> càda-o canchicú<sup>n</sup> nihnu-o.

<sup>5</sup>Te té Ènóc téé ní xíndecu ndéé sanaha ñà túú ní xíhí-dé chi ní nacuaca ñaha túu Yá Ndiöxí xii-dé cuèndá sá nĩ sándáá iní ñáhá-dě xii-gá. Te vá yõo ni nànihí ñáhá xii-dé chi mee-gã ní nacuaca ñaha-gã xii-dé. Te núú tütú Yã Ndiöxí cächí-xi sá cùtnàhá vátá nácuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gã xii-dé. <sup>6</sup>Te nchaa ñáyíu ñá túú sàndáá iní ñáhá xii Yá Ndiöxí ñá ndácũ-yu cadá-yu nàcuáa cudìú-yu núú-gã, chi nchaa ñáyíu cuìní tuha ñaha xii-gá xíní ñùhu-xi sá quíndáá iní-yu sá ndécú-gã, te quíndáá iní-yu sá nũu na nànducu nihnu ñahá-yu xii-gá te cuãñaha-gã xii-yu sá ndúú tãhũ-yu.

<sup>7</sup>Te Yá Ndiöxí ní dátũha-gá ndíi Nõé nchaa nàcuáa cada-gá. Te ní quide ndíi nchaa nàcuáa ní xáha<sup>n</sup> Yã Ndiöxí cada ndíi, te ní cadúha ndíi ì<sup>n</sup> bàrcú cuèndá xití bàrcú-á<sup>n</sup> quèe ndíi ndíhi nchaa ñáyíu vehe ndíi cuèndá cácu nihnú-yu. Te duca<sup>n</sup> nĩ quide ndíi chi ní sándáá iní ndíi Yá Ndiöxí. Te sá dúcá<sup>n</sup> nĩ sándáá iní ndíi-á<sup>n</sup> Yã Ndiöxí xíã<sup>n</sup> ní cutnùní sá ncháá ñáyíu ío ndècu cuéchi-yu, chi ñá túú ní cãchicú<sup>n</sup> nihnú-yu cadá-yu nàcuáa ní quide ndíi. Te sá dúcá<sup>n</sup> nĩ quide ndíi ní sándáá iní ndíi Yá Ndiöxí xíã<sup>n</sup> ío ní cundáá ndíi núú-gã.

<sup>8</sup>Te Yá Ndiöxí ní xáha<sup>n</sup>-gã xii ndíi Àbrahám sá quèé ndíi ñuú núú ndécú ndíi quíhí<sup>n</sup> ndíi ìngá xichi cundecu ndíi. Te ní quide ndíi nàcuáa ní xáha<sup>n</sup> Yã Ndiöxí chi ní quee ndíi cuáhá<sup>n</sup> ndíi núú cuãñaha Yã Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndèé cúú nũú cuàhá<sup>n</sup> ndíi cundecu ndíi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. <sup>9</sup>Te sá dúcá<sup>n</sup> nĩ sándáá iní ndíi Yá Ndiöxí nũu xíã<sup>n</sup> ní xíndecu ndíi núú nĩ sãñaha-gã cundecu ndíi, te cuèi duca<sup>n</sup> dico ñá túú ní quide ñuú ndíi xíã<sup>n</sup>. Te ní xóo cundecu ndíi vehe cùtexínu vehe dóó. Te ñíu-ni duca<sup>n</sup> nĩ quide ndíi Isàác ndíhi ndíi Jàcób chi tnàhá cue ndíi-á<sup>n</sup> nĩ cachí Yã Ndiöxí sá ndúú tãhú cue ndíi xíã<sup>n</sup> cundecu cue ndíi. <sup>10</sup>Te duca<sup>n</sup> nĩ quide ndíi Àbrahám chi ní xíndetu ndíi ndéé ní sáá nduu ndùu táhú ndíi cundecu ndíi núú ndécú Yã Ndiöxí. Te núú ndécú-gã-á<sup>n</sup> cúú-xí ñuú ní cadúha mee-gã, te ñuú-á<sup>n</sup> cudíi-xi ni caa ni quíhí<sup>n</sup>.

<sup>11</sup>Te ndíi Sãrá, sa ní xídó cuíá ndíi sá cóó dèhe ndíi chi sa ní sahnu vèhi ndíi, dico Yá Ndiöxí ní quide-gá te ní xóo ì<sup>n</sup> dèhe ndíi. Te duca<sup>n</sup> chi ní sándáá iní ndíi Yá Ndiöxí te ní cutnùní ndáá iní ndíi sá cadá-gã nàcuáa ní xáha<sup>n</sup>-gã xii ndíi. <sup>12</sup>Te cuèi ío ní sahnu ndíi Àbrahám ndíhi ñadìhí ndíi,

ndíi Sără dico dacuitíi nǐ nduu táhǔ-yu ní xóo ii<sup>n</sup> déhe-yu. Te xǎ<sup>n</sup> nǔu ío cuéhé ndǐqui<sup>n</sup> yǎvá ndíi Àbrahám ní cáyá dàtná cuéhé chòdíní ndéè andiu, ndíhi dàtná cuéhé ñuhu cúchí làmár, chi ni vǎ yǒo ii<sup>n</sup> ndacu cahu ñaha xǐi-yu sá cuéhě-yu.

**13**Te cue ndíi-á<sup>n</sup> duca<sup>n</sup>-ni nǐ sándáá iní cue ndíi Yá Ndiǒxí ndéé ní sáá nduu nǐ xǐhí cue ndíi. Te cue ndíi-á<sup>n</sup> ñà túú ní ndùu táhú cue ndíi quiní cue ndíi nchaa nàcuáa ní cachí Yǎ Ndiǒxí cada-gá, dico ní cutnùní ndáá iní cue ndíi-á<sup>n</sup> nàcuáa cada-gá núu cuàhá<sup>n</sup> núu vǔxi. Te ío ní cudǐí iní cue ndíi, te ní cachí cue ndíi sá dìcò-ni ichi yáha cue ndíi ñuyíú-a, chi ñá dǐú ñuyíú-a cundecu duca<sup>n</sup> cuè ndíi. **14**Te sá dúcá<sup>n</sup> ndùu tnúhu ní cáhá<sup>n</sup> cue ndíi-á<sup>n</sup>, xǎ<sup>n</sup> ní cutnùní sá cuìní cue ndíi ingá xichi núu cúndècu cue ndíi. **15**Te ni ñà dǐú ñùú núu nǐ quee cue ndíi ni cuìní cue ndíi núhú cue ndíi. Chi núu duca<sup>n</sup> ni sàni iní cue ndíi te núhú cue ndíi ni cùu. **16**Dico ñáhá chi cuìní cue ndíi quǐhǐ<sup>n</sup> cue ndíi ii<sup>n</sup> xichi núu vǎha-gá cáá cundecu cue ndíi. Te núu dúcá<sup>n</sup> ño-gá vǎha càa-á<sup>n</sup> cúu-xí ñùú núu ndécú Yǎ Ndiǒxí, te sá dúcá<sup>n</sup> nǐ sani iní cue ndíi xǎ<sup>n</sup> nǔu ío vǎha cùu iní Yǎ Ndiǒxí càchí-gá sá ñà túú cùcaha<sup>n</sup> núu-gǎ cúu-gǎ Ndiǒxí cue ndíi-á<sup>n</sup>, te cùnuni iní-ó sǎ ndáá sá dúcá<sup>n</sup> càhá<sup>n</sup>-gá chi ní quide túha-gá ii<sup>n</sup> xichi núu cúndècu cue ndíi-á<sup>n</sup>.

**17**Te ndíi Àbrahám ní xíndecu ii<sup>n</sup>dìi-ni déhe ndíi ndíhi ñadìhí ndíi, te cútnàhá ní xito ndéé ñáhá Yǎ Ndiǒxí xii ndíi ní xícá<sup>n</sup>-gá déhe ndíi, ndíi Isàác cuèndá nduu táhú ñáhá-gǎ xii ndíi. Te ní xáha<sup>n</sup> ndíi sá cúu ndùu táhú-gǎ déhe ndíi, te duca<sup>n</sup> nǐ quide ndíi chi ní sándáá iní ñáhá ndíi xii-gá. Te sa ndècu túha ndíi sá cuǎñaha ndíi déhe ndíi xii-gá cuèi mee Yǎ Ndiǒxí ní xáha<sup>n</sup> ndáá-gá xii ndíi **18**sá sǎ cuèndá ndíi Isàác te ngúndecu cue ñaní tnáhá ndíi. **19**Te duca<sup>n</sup> nǐ quide ndíi Àbrahám, chi ní cutnùní ndáá iní ndíi sá Yǎ Ndiǒxí ndácú-gǎ dándòto-gá cuèi ñáyiu sa ní xǐhí. Te sá dúcá<sup>n</sup> nǐ xáha<sup>n</sup> ndíi xii Yá Ndiǒxí sá cúu ndùu táhú-gǎ déhe ndíi, te xǎ<sup>n</sup> cada iní-ó sǎ sà ní xǐhí ndíi Isàác te ní ndoto tucu ndíi ní nucúndecu ndíi ndíhi tǎtá ndíi, ndíi Àbrahám.

**20**Te ndíi Isàác ní xícá<sup>n</sup> táhú ndíi núu Yǎ Ndiǒxí cuèndá sá cadá vǎha-gá cue déhe ndíi, ndíi Jàcób ndíhi ndíi Esàú núu cuàhá<sup>n</sup> núu vǔxi. Te duca<sup>n</sup> nǐ quide ndíi chi ní sándáá iní ndíi Yá Ndiǒxí. **21**Te sa ta cùyatni-ná nduu cùú ndíi Jàcób, te ní xícá<sup>n</sup> táhú ndíi núu Yǎ Ndiǒxí cuèndá cue déhe ñaní ndíi déhe ndíi Chèé. Te yìtuu-ná ndíi tatnu ndíi ní chiñuhu ndíi Yá Ndiǒxí. Te duca<sup>n</sup> nǐ quide ndíi chi ní sándáá iní ñáhá ndíi xii-gá. **22**Te cútnàhá sa ta cùyatni víi-nǎ nduu cùú ndíi Chèé, te ní cachí ndíi sá cuè ñáyiu isràél sáá nduu quèé-yu núu xíndecú-yu-á<sup>n</sup>. Te ní cáhá<sup>n</sup> tucu ndíi nàcuáa cadá-yu yiqui cùñú ndíi na sáá nduu quèé-yu núu ndécú-yu-á<sup>n</sup>. Te duca<sup>n</sup> nǐ quide ndíi chi ní sándáá iní ndíi Yá Ndiǒxí.

23Te cútnàhá ní cacu ndíi Moisés te ní chiváha ñaha nãná ndíi ndíhi tãtã ndíi úní yóó. Te duca<sup>n</sup> ñí quide cue ndíi-á<sup>n</sup> chi ní sãndáá iní cue ndíi Yá Ndiöxí. Te ní quide cuendá cue ndíi-á<sup>n</sup> sã ïo váha càa ndíi Moisés déhe cue ndíi, te ñá túú ní yùhú cue ndíi nàcuáa ní cáhá<sup>n</sup> tée cùu Faraón sá cáhni-dě cue landú. 24Te sãtã ñí sahnu ndíi Moisés te duu<sup>n</sup> duu<sup>n</sup> ní cachí ndíi sã vã càhá<sup>n</sup> ñáyiu sã déhe yoco tée cùu Faraón cúú nãná ndíi. Te duca<sup>n</sup> ñí quide ndíi chi ní sãndáá iní ndíi Yá Ndiöxí. 25Te duca<sup>n</sup> ñí quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuendá Yã Ndiöxí dàcúxí sã cúdĩ ìní ndíi cundecu tnaa ndíi ichi cuèhé ichi duha. 26Chi ní sani iní ndíi sã vãha-gá ndoho ndíi cúcuèhé ñáhã cuè ñáyiu xii ndíi sã cuendá Yaá quixi ñuyíú-a dàcúxí sã cùndècu ndíhi ndíi nchaa sã ïó Ègiptú. Te duca<sup>n</sup> ñí quide ndíi chi ní xúhu<sup>n</sup> iní ndíi sã Yã Ndiöxí cuãñaha-gã sã ndúú tãhú ndíi. 27Te ndíi Moisés ní quee ndíi nació<sup>n</sup> Ègiptú te ñá túú ní quide cuendá ndíi sã ïo cùdèé<sup>n</sup> tée cùu Faraón núú ndíi. Te duca<sup>n</sup> ñí quide ndíi chi ní sãndáá iní ndíi Yá Ndiöxí. Te ní quide càhnu iní ndíi cuendá nchaa sã ñí yãha ndíi, te ní quide iní ndíi sã Yã Ndiöxí ndécú ndíhi ñaha túu-gã xii ndíi cuèi ñá túú ní xìní núú ñáhã ndíi xii-gã. Te duca<sup>n</sup> ñí sani iní ndíi chi Yá Ndiöxí ndécú ndíhi ñaha-gã xii ndíi.

28Te ndíi Moisés cúú ndíi tée ní tausaha ñí quide vico pãscuá ndíhi cue ñáyiu isràél, te dàvá-á<sup>n</sup> ñí táuchíú<sup>n</sup> ndíi ní sahní-yu mbèé te ñíñí quiti-á<sup>n</sup> ñí dácánùú-yu yuyèhé-yu. Te duca<sup>n</sup> ñí quide ndíi chi ní sãndáá iní ndíi Yá Ndiöxí. Te duca<sup>n</sup> ñí quide tucu ndíi cuendá sã espíritú sã ñí tendaha Yã Ndiöxí cahni-xi mee-ni déhe tée déhe díhna cue ñáyiu Ègiptú, te vá cáhni-xí ñí ñí<sup>n</sup> déhe cue ñáyiu isràél. 29Te ndute làmár sã nání Mãr Tícuèhé ní quée dava-xi ní natúu ñuhu yìchí ní níhí ñí yãha cue ñáyiu isràél. Te duca<sup>n</sup> ñí cuu chi ní sãndáá iní-yu Yá Ndiöxí. Te cue tée Ègiptú tnahã-güedé nchìcú<sup>n</sup>-güedé cuáhã<sup>n</sup> dico ñá túú ní ndàcu-güedé yãha-güedé chi ní ndíhi-güedé ní cáhá.

30Te cue ñáyiu isràél ní dúcú<sup>n</sup> ndèé-yu úsã nduu ñuú Jericó te ní ngoyo nchaa sã ñúdòco. Te duca<sup>n</sup> ñí cuu chi ní sãndáá iní-yu Yá Ndiöxí. 31Te ñí<sup>n</sup> ñaha ní xíndecu ichi díí ìní ní xínani-a<sup>n</sup> Ràháb, ñaha-á<sup>n</sup> ñà túú ní xíhí-a<sup>n</sup> dàtnã ní xíhí nchaa ñáyiu ïo ní cuu sãã iní-xi núú Yã Ndiöxí, chi ní cuu váha iní-a<sup>n</sup> núú cuè tée ní tendaha cuè ñáyiu isràél ní sãngoto dayuhu ñùú-a<sup>n</sup>. Te duca<sup>n</sup> ñí quide-a<sup>n</sup> chi ní sãndáá iní-a<sup>n</sup> Yá Ndiöxí.

32Te núu dìcò sã cúú te cáhá<sup>n</sup>-í cuendá ndíi Gedèón, ndíhi cuendá ndíi Bàràc, ndíhi cuendá ndíi Sànsón, ndíhi cuendá ndíi Jèfté, ndíhi cuendá ndíi Dàvíí, ndíhi cuendá ndíi Sàmuel, ndíhi cuendá nchaa cue tée ní xóo cáhá<sup>n</sup> tnuhu Yá Ndiöxí ndéé sanaha, te nchaa cuendá cue tée-á<sup>n</sup> cãhá<sup>n</sup>-í te núu dìcò cùyáchí-í dico ñá túú cùyáchí-í. 33Te nchaa cue ndíi-á<sup>n</sup> ni sãndáá iní cue ndíi Yá Ndiöxí ñuu xíã<sup>n</sup> ní xóo ndacu cue ndíi ní xóo nãã cue ndíi ndíhi



nchaa ñáyiú dava-gá ñuú. Te nchaa ñáyiú-á<sup>n</sup> ñà túú ní xõo ndacú-yu nàá-yu ndihí cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yă Ndiõxí xii cue ndíi dàtná ní cachí-gá cada ñaha-gă xii cue ndíi. Te cuëi nchaa cue quití déé<sup>n</sup> ñà túú ní ndàcu-güedi ná cada ñaha-güedi xii cue ndíi. **34**Te ní xóo ndacu cue ndíi ní xóo ndahvá cue ndíi ñuhú sá vă yõo tnàhí ndàcu ndahvá, te ní cácu cue ndíi vá yõo ni ndàcu cahni ñaha xii cue ndíi. Te cue ndíi-á<sup>n</sup> ñà túú ñihí ndéé cuè ndíi ni cùu, dico ní ñihí ndéé cuè ndíi chi Yă Ndiõxí ní chindee ñaha-gá xii cue ndíi, te nchaa ndíi-á<sup>n</sup> ïo ní ñihí ndéé cuè ndíi ní nàá cue ndíi ndihí nchaa ñáyiú ní cuu úhú iní ñáhá xii cue ndíi, te nchaa ñáyiú duca<sup>n</sup> ñi xóo nàá ndihí cue ndíi-á<sup>n</sup> ñà túú ní xõo ndacú-yu nàá ndihí ñahá-yu xii cue ndíi chi ní xóo cunú-yu. Te duca<sup>n</sup> ñi cuu chi ní sándáá iní cue ndíi Yă Ndiõxí. **35**Te dava ñáyiú ñihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tùcú-yu.

Te dava ñáyiú ío ní dándóhó ñaha tnaha ñáyiú-yu te ní xíhí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te duca<sup>n</sup> chi ní cuiní-yu sá ndótõ-yu ndéé cuèé-gá nàcuáa ngúndecu váha-yu núú ndécú Yă Ndiõxí. **36**Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní caníhá-yu xii cue ndíi, te dava cue ndíi ní dácútú ñahá-yu, te ní chihi ñahá-yu xii cue ndíi vecaá. **37**Te dava cue ndíi ní sahani ñahá-yu ndihí yúú. Te dava cue ndíi ní chidava ndáá ñáhă-yu ní xehndé ñáhă-yu ndihí sierrá. Te dava cue ndíi ní xito ndéé ñáhă-yu te núu ndisa sá sándáá iní cue ndíi Yă Ndiõxí, te dava cue ndíi ní sahani ñahá-yu ndihí machítí. Te mee-ni ñi mbéé ndihí ñi chívá, ní xóo cuu dóo cue ndíi. Te mee-ni ñi cue quití-á<sup>n</sup> ñi xóo cuu dóo cue ndíi cuëi ndëni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandíhú-yu iní cue ndíi, te nándi sá ñi xóo cada ñahá-yu xii cue ndíi ní xóo dandòho ñahá-yu. **38**Te cue ndíi-á<sup>n</sup> ïo-gá ní xínduu váha iní cue ndíi dácúxí nchaa dava-gá ñáyiú. Te nchaa cue ndíi-á<sup>n</sup> ñi xica cuu cue ndíi cuëi nchaa núú ñà túú vă yõo tnàhí ndècu, te cuëi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndëni ní cuu nchí yaú ní xóo cundecu cue ndíi. **39**Te ío ní cudíu cue ndíi núú Yă Ndiõxí cuèndá sá ni sándáá iní ñáhá cuè ndíi xii-gá. Te cuëi duca<sup>n</sup> ñi quide cue ndíi dico ñá túú ní xíní cue ndíi nchaa sá ñi cachí Yă Ndiõxí cada-gá. **40**Te duca<sup>n</sup> ñi cuu chi ñi sá ïo-gá váha ní cachí Yă Ndiõxí cada-gá. Te sá dúcá<sup>n</sup> ïo-gá váha ní cachí-gá cada-gá cúú-xí cuèndá nchoo ndihí cuèndá cue ndíi-á<sup>n</sup> cuèndá sá ñà díú mée-ni cue ndíi-á<sup>n</sup> cundáá cue ndíi núú-gă, chi tnàhá nchoo cundáá-ó nũú-gă.



Ío cuhu<sup>n</sup> iní-ó Xítohó Jesucrístú

**12** <sup>1</sup>Te cue ñáyu ní xindecu ndéé sanaha ñí quidé-yu nàcuáa ní cutnùní sá ñí sándáá iní-yu Yá Ndiöxí. Te cada iní-ó sã ncháá ñáyu-á<sup>n</sup> xíndéhé ñàhá-yu xii-o vìtna. Núu xíá<sup>n</sup> xíní ñùhu-xi sá vã cáda-ó nì ìí<sup>n</sup> sá cuèhé sá dúhá chi ñiu nchaa xíá<sup>n</sup> quidé-xí ñà túú cùndáá-ó núú Yá Ndiöxí. Te vã cáda cuendá-ó ncháa sá quidé tñèñu iní-ó nàcuáa ndacu-o càda-o nchaa nacuáa càhá<sup>n</sup>-gá. Te ío càhnu cunduu iní-ó cànchicú<sup>n</sup> nihnu-o càda-o nchaa nacuáa ní cachí-gá cada-o cùndecu-o ñuyíú-a. <sup>2</sup>Te ío cuhu<sup>n</sup> iní-ó Xítohó Jesucrístú, chi ñiu-gá ní quide ní sándáá iní-ó Yá Ndiöxí, te ñiu-ni duca<sup>n</sup> quide-gá cuèi vitna te cuèi ndéé núú cuàhá<sup>n</sup> núú vèxi ñiu-ni duca<sup>n</sup> càda-gá sá quèndáá iní-ó Yá Ndiöxí. Te Xítohó Jesucrístú ío ní quide ndee ìní-gá ní ndoho-gá te ní xíhí-gá núú cùrúxí, te ñá túú ní quide cuendá-gá cuèi ìí<sup>n</sup> sácá<sup>n</sup> núú cúú-xí sã dúcá<sup>n</sup> ñí ndoho-gá. Te duca<sup>n</sup> ñí quide-gá chi sa ñàha-gá sá ná yãha sá dúcá<sup>n</sup> ndòho-gá te ío cudíí ìní-gá. Te vìtna núcóo-gá xio cùha núú núcóo Yá Ndiöxí te tàxi tnuní-gá.

<sup>3</sup>Te xini ñuhu-xi sá ío cada cuendá-ndó nàcuáa ní quide Xítohó Jesucrístú chi Yaá-á<sup>n</sup> ío ní quide càhnu iní-gá nchaa sá ñí ndoho-gá ní quide ñàha ncháa ñáyu ndècu ichi cuehé ichi duha xii-gá. Te duca<sup>n</sup> càda cuendá-ndó nàcuáa ní quide-gá cuendá sá vã túu dusa<sup>n</sup>-ndo, te ni vã nátùhú iní-ndó càda-ndo nchaa nacuáa càhá<sup>n</sup>-gá. <sup>4</sup>Te nchòhó dáquèe tìhú-ndó ncháa sá cuèhé sá dúhá dico vátá cáhni ñàha-gá-yu xii-ndo sã dúcá<sup>n</sup> quide-ndo. <sup>5</sup>Te ndacu iní-ndó nàcuáa càhá<sup>n</sup> Tátá-ó Dütú Ndiöxí dásàhú ñàhá-gã xii nchoo cuè ñáyu cùu déhe-gá. Te duha càchí-gá núú tütú-gá:

Nchòhó cue déhe mee-í, vã cání ìní-ndó sã àú<sup>n</sup> ñà cuu dándoho ñàha-í xii-ndo,  
te ni vã nátùhú iní-ndó òré càhá<sup>n</sup>-í dóho-ndo nàcuáa cada-ndo cùndecu-ndo.

<sup>6</sup>Chi mee-í dándòho-í nchaa ñáyu cùu iní-í cuendá sá cùndáá-yu núú-í,

te quide úhú-í-yu, te ñiu-ní-yu cùú-yu ñáyu càchí-í cúú dèhe-í. Duha càchí-gá núú tütú-gá. <sup>7</sup>Te ío cada ndee ìní-ndó sã dúcá<sup>n</sup> dándoho ñàha Yá Ndiöxí xii-ndo, chi quide-gá sá cúú-gã Tátá-ó. Te ñá túú nì ìí<sup>n</sup> téé cùu tátá te cachí-ó sã ñà túú sànu ichi-dé cue déhe-dé nàcuáa tàú-xi cunduu. <sup>8</sup>Te núu Yá Ndiöxí ñá túú dándoho ñàha-gá xii-ndo dàtná dándòho-gá cue ñáyu càchí-gá cúú dèhe-gá, te ñá díú dèhe mee-gã cúú-ndó te núu duca<sup>n</sup>, chi cùu-ndo datná cue ñáyu ñá túú cùtnuní yoo cùu tátá-xi. <sup>9</sup>Te nchoo sà ñàha-o sá cùtnàhá ní cuu landú-ó ñí sanu ichi ñàha tátá-ó nàcuáa tàú-xi cunduu, te duca<sup>n</sup> ñí xóo canehe-o sã yíñùhu núú-güedë

te diu-ni duca<sup>n</sup> nèhe-o sá yíñùhu núú-güedě vitna. Te núu duca<sup>n</sup> ñí sándáá iní-ó tătă-ó, te ío-gá xíní ñùhu-xi quíndáá iní-ó Tătă-ó Dütú Ndiöxí cuendá duca<sup>n</sup> ndùu táhú-ó cùndecu-o ndìhi-gá ni caa ni quíhí<sup>n</sup>, chi diu-gá cúú-gă Yaá ní chihi iní-ó. **10**Te cútnàhá ní cuu landú-ó, ñá túú tìtní nduu ni càniha tătă-ó ñí sanu ichi ñaha-güedě xii-o nàcuáa ní cuu iní méé-güedě. Te Yá Ndiöxí duca<sup>n</sup> dândoho ñaha-gá xii-o sànu ichi ñaha-gá cuendá cúú-xí să vâha sá cúú-xí-ó, te duca<sup>n</sup> quède-gá cuendá nchoo càda ndáá-ó dâtná quidé mèe-gá. **11**Te òré véxi ì<sup>n</sup> tnúndòho sá cúú-xí-ó te ñá túú cùdí iní-ó chi dândihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-á<sup>n</sup> te ngüíta-yu quède ndáá-yu, te ío vâha cùu iní-yu ndècú-yu.

### Vá dáquèe tihú-ó tnùhu Yá Ndiöxí

**12**Te núu xíá<sup>n</sup> ío chí ndúcú ndèe-gá canchicú<sup>n</sup> nihnu-ndo ìchi Xítóhó Jesucristú, te vá dicó yica cùu iní-ndó cànchicú<sup>n</sup> nihnu-ndo ìchi-gá. **13**Te cada váha-ndo cùndecu-ndo ichi-gá cuendá nchaa ñáyiú sàni ì<sup>n</sup> sani úú iní-xi níhí ndéè-yu cundecú-yu ichi-gá te vá ná tùhú iní-yu canchicú<sup>n</sup> nihnú-yu.

**14**Te nducu-ndo nàcuáa cada-ndo cùndecu váha-ndo ndìhi cue tnaha ñáyiú-ndo, te ío cada váha-ndo cùndecu-ndo nacuáa cundáá-ndó nùú Yá Ndiöxí chi núu vá dúcá<sup>n</sup> càda-ndo te vá ndúú táhú-ndó cùndecu-ndo ndìhi-gá. **15**Te ío váha cada cuendá-ndó nàcuáa cada-ndo cùndecu-ndo, chi núu ñáhá te vá chíndèe ñaha-gá Yá Ndiöxí xii-ndo. Te ío váha cada cuendá tucu-ndo nàcuáa cundecu-ndo vă cání cuèhé iní-ndó cuendá Yá Ndiöxí, chi núu duca<sup>n</sup> na càda-ndo te dava-gá ñáyiú ndècu ndìhi-ndo ichi-gá tnàhá-yu ngüíta-yu duca<sup>n</sup> càdá-yu, te vá cùndècu váha-gá-ndó ndìhí-yu ichi-gá. **16**Te cada cuendá tucu-ndo să vă cùndècu-ndo ichi díí iní, te ni vă dáquèe tihú-ndó ñí ì<sup>n</sup> sá cúú cuendá Yá Ndiöxí dâtná ní quide ndíi Esàú, chi sá cuãñaha tătă ndíi-á<sup>n</sup> nduu táhú ndíi ni cùu ní dama ndíi ì<sup>n</sup> cóhó comidá. **17**Te nchòhó sa nàha-ndo sá cùtnàhá ní cuiní ndíi Esàú cáca<sup>n</sup> táhú tătă ndíi núú Yá Ndiöxí cuendá nchaa sá ndúú táhú ndíi ni cùu, te ñá túú ní xicá<sup>n</sup> tàhú tătă ndíi núú Yá Ndiöxí nàcuáa cuiní méé ndíi ni cùu. Te ní ndáhyú víhí ndíi, te cuèi duca<sup>n</sup> ñí quide ndíi dico ñá túú ní ndàcu-gá ndíi nàníhí ndíi táhú să ñí dama ndíi comidá.

**18**Te cue ñáyiú isràél ní sátuhá-yu ì<sup>n</sup> yucu núú càyú ñuhú, te nchòhó ñá túú ndèe duca<sup>n</sup> sàhá<sup>n</sup> tuha-ndo ì<sup>n</sup> yucu núú càyú ñuhú dâtná ní quide cue ñáyiú-á<sup>n</sup>. Te cútnàhá duca<sup>n</sup> ñí sátuhá-yu yucu-á<sup>n</sup> te ní cunee vîhi nihí yucu-á<sup>n</sup>, te ní quene táchí ñíhi. **19**Te ní tecú dóho-yu ní cáhá<sup>n</sup> ì<sup>n</sup> cútú, te ní tecú tucu dóho-yu ní cáhá<sup>n</sup> Yá Ndiöxí ní cáhá<sup>n</sup> ndìhi ñaha-gă xí-yu. Te nchaa ñáyiú ní tecú dóho-xi ní cáhá<sup>n</sup>-gá te ní cuiní-yu sá vă càhá<sup>n</sup>-gá. **20**Te duca<sup>n</sup> ñí quidé-yu chi ñá túú ní cùndee iní-yu nàcuáa ní cáhá<sup>n</sup>-gá, te duha

ní cachí-gá: “Te cuèi ì<sup>n</sup> quiti nà yáha xití yucu-a, te cahni-ndo-di ndìhi yúú àdi ndìhi ì<sup>n</sup> yutnu puyá”, duha ní cachí-gá. <sup>21</sup>Te sá dúcá<sup>n</sup> ñí quide-xi ní xiní-yu xíá<sup>n</sup> ío ní dáyùhú ñáhá-xí xíi-yu. Te tnahá té Moisés ní yùhú-dé, te ní cachí-dé: “Quèdi ñaha-xi xii-í sá yùhú-í”, duha ní cachí-dé.

<sup>22</sup>Te nchòhó, ñá túú quide-ndo datná ní quide cue ñáyiu-á<sup>n</sup> ñí sáhá<sup>n</sup> tuhá-yu yucu-á<sup>n</sup>, dico cada iní-ndó sã sà ní tuha-ndo yùcu Sión sá ndécú nùú ndécú Yã Ndiöxí, ndìhi ñuú-gá ñuú Jerusàlén sá cáá àndiu te ñiu-gá cúú-gã Yaá ndécú nchàa nduu nchaa quíú. Te ñiu-ni xíá<sup>n</sup> xíndecu cuéhé víhí cuè espíritú xínú cuèchi núú-gã <sup>23</sup>chíñùhu ñaha-xi xii-gá. Te nchòhó cúú-ndó cuè ñáyiu cùu cuendá Yã Ndiöxí, te ní tnahá tnúhu-ndo ndìhi nchaa dava-gá ñáyiu cùu cuendá-gá, ñáyiu yòdo tnuní núú tütú-gá ndécú àndiu, te ñiu-ni ñáyiu-á<sup>n</sup> cuãñaha-gã xii-yu sá ndúú tãhù-yu. Te nchòhó ní tuha-ndo Yã Ndiöxí Yaá cada ndáá yícá cuèchi nchaa ñáyiu. Te cada iní-ndó sã ñí tnahá tnúhu-ndo ndìhi cue ñáyiu ní quide ndáá ní xíndecu ichi Yá Ndiöxí ñuyíú-a. Te ñáyiu-á<sup>n</sup> ñà túú tnahí-gá ná cúmãñi-yu vitna ndécú-yu núú-gã. <sup>24</sup>Te ní tnahá tnúhu-ndo ndìhi Xítohó Jesucrìstú Yaá ní quide nàcuáa cada Yá Ndiöxí ingá núú sã vãha sá cúú-xí nchaa nchoo ñáyiu ndècu ñuyíú-a, chi ní sati níñí-gã te ní xíhí-gá núú cùrúxí. Te níñí Xítohó Jesucrìstú ñá túú ì<sup>n</sup>-ni cuu-xi ndìhi níñí ndíi Àbél, chi ñiu cuendá níñí-gã-á<sup>n</sup> ñí quide càhnu iní Yã Ndiöxí nchaa cuèchi-o.

<sup>25</sup>Núú xíá<sup>n</sup> ío cada cuendá-ndó vã dáquèe tihú-ndó tnúhu càhá<sup>n</sup> Yã Ndiöxí, chi nchaa ñáyiu ní xíndecu ndéé sanaha dùca<sup>n</sup> ní quidé-yu ní dáquée tihù-yu tnúhu ní cáhá<sup>n</sup>-gá ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcá<sup>n</sup> ñí quidé-yu. Te uu<sup>n</sup>-gá tucu nchoo chi vá cãcu-o te núú duca<sup>n</sup> na dàquee tihú-ó tnúhu càhá<sup>n</sup> Yã Ndiöxí ndéé andiu sã cúú-xí-ó. <sup>26</sup>Te cútnahá ní cáhá<sup>n</sup> Yã Ndiöxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú duca<sup>n</sup> quèdi-í chi tnahá andiu quèdi-í”, càchí-gá. <sup>27</sup>Te sá dúcá<sup>n</sup> càhá<sup>n</sup>-gá sá ingá xito tucu duca<sup>n</sup> càda-gá xíá<sup>n</sup> cútnuní sá ncháandì túhú sá tùu ndèhe-o danaa-gá. Te nchaa sã ñà túú ndéé tùu quini-ó ñuyíú-a xíá<sup>n</sup> vá quídí-xí te ni vã náá-xí. <sup>28</sup>Te núú ñí cachí Yã Ndiöxí nduu táhú-ó cùndecu-o chi mee-gã táxí tnùnigá xíá<sup>n</sup>, te ni vã quídí-xí te ni vã náá-xí. Te xíá<sup>n</sup> ío xini ñuhu-xi ndacá<sup>n</sup> táhú-ó nùú-gã, te yíñùhu yíñuhu cunu cuechi-o núú-gã nàcuáa cuu váha iní-gá, te duca<sup>n</sup> cùhu<sup>n</sup> iní-ó sã ño càhnu cuu-gá. <sup>29</sup>Te Tãtá-ó Dütú Ndiöxí cúú-gã dàtná ì<sup>n</sup> ñuhú chi danàa-gá nchaa sá ñà túú quide nàcuáa cuu váha iní-gá.

Nàcuáa tàú-xi cada-o cuendá cuu váha iní Yã Ndiöxí

**13** <sup>1</sup>Te nchaa nchòhó ñáyiu ndècu ichi Xítohó Jesucrìstú, vá dáñá ndéé-ndó cùu iní tnahá-ndó nàcuáa ndècu-ndo ichi-gá. <sup>2</sup>Te

cunaha-ndo sã nõu lõ ñáyiũ ñũhu ichi ní quexiõ-yu vehe-ndo te cuãñaha-ndo vèhe ndetatú-yu, te cuãñaha-ndo sã cáxi-yu. Chi davá-yu ndéé espíritú xínú cuèchi núú Yã Ndiõxí ní sáhá<sup>n</sup> vehé-yu ní quehe<sup>n</sup> cuèndá-yu te ñá túú ní cùtnuní iní-yu sá dǐú espíritú xínú cuèchi núú-gã cúú-xí.

<sup>3</sup>Te ndacu tucu iní-ndó cuè ñáyiũ xixíhi vecaá, te cada iní-ndó sã tnàhá-ndó yìhi-ndo vecaá ndihí-yu. Te ndacu tucu iní-ndó nchàa ñáyiũ ío ndòho, te cada iní-ndó sã tnàhá-ndó ndòho-ndo ndihí-yu.

<sup>4</sup>Te nchaa ñáyiũ na càchí-yu sá ì<sup>n</sup> sá vãha cùu-xi sá ì<sup>n</sup> tée ndihí ì<sup>n</sup> ñadìhí ná nihí tnáhã-yu candeca tnàhá-yu. Te nchòhó cue tée vá cání ìní-ndó cãhá<sup>n</sup> ndihí-ndo ñadìhí te núu ñá dǐú ñadìhí-ndó cúú-yu. Te duca<sup>n</sup>-ni nchòhó cue ñáyiũ dǐhí tucu vá cání ìní-ndó cãhá<sup>n</sup> ndihí-ndo tée te núu ñá dǐú yìi-ndo cuu-güedé, chi Yá Ndiõxí dandòho-gã nchaa ñáyiũ ndècu ichi dǐí ìní.

<sup>5</sup>Te vá cúhú<sup>n</sup> ìní-ndó mèe-ni dǐhú<sup>n</sup>. Te núu nándi cùu nchaa sá ndécú ndihí-ndo te dǐu-ni nchaa xǐã<sup>n</sup> sa nduu vétú iní-ndó, chi Yá Ndiõxí ní cachí-gá: “Ni ì<sup>n</sup> nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá. <sup>6</sup>Te xǐã<sup>n</sup> nõu nchoo nì yuhu nì iní-ó cãhá<sup>n</sup>-ó ì<sup>n</sup> ì<sup>n</sup>-o, te cachí-ó:

Yá Ndiõxí cúú-gã Yaá chindèe ñaha xii-í,  
núu xǐã<sup>n</sup> ñá túú yùhú-í cuèi nándi càhá<sup>n</sup> ñáyiũ cada ñàhá-yu xii-í.  
Duha cachí-ó.

<sup>7</sup>Chí ndácú ìní cue tée ní sanu ichi ñaha xii-ndo ichi Xítóhó Jesucristú cue tée ní cáhá<sup>n</sup> tnúhu Yá Ndiõxí núú-ndó, te ío váha chí nácuãha cuèndá nàcuáa ní quide nchaa cue tée-á<sup>n</sup> ñí xíndecu-güedé ndéé ní sáá nduu ñí xíhí-güedé. Te ío quindáa iní-ndó Yã Ndiõxí dàtná ní xóo cada cue tée-á<sup>n</sup>.

<sup>8</sup>Te dàtná-ni ní quide Xítóhó Jesucristú ndéé sanaha dǐu-ni duca<sup>n</sup> quide-gá vitna, te dǐu-ni duca<sup>n</sup> càda-gá ndéé núú cuàhá<sup>n</sup> núú vèxi. <sup>9</sup>Te vá dáñá-ndó mèe-ndo dandahú ñáhá ñáyiũ dacàhá<sup>n</sup> ñáhá xii-ndo natuha-ndo ìngá ichi, ñáyiũ dànehé tnàha ñáyiũ-xi nándi sá ñí cutúha-yu, te nchaa xǐã<sup>n</sup> ñá túú ì<sup>n</sup>-ni cahá<sup>n</sup>-xi ndihí tnúhu sá ndécú ndihí-ndo. Te Yá Ndiõxí chindèe ñaha-gá xii-o nàcuáa níhí ndéé-ó cùndecu-o ichi-gá, te duca<sup>n</sup> te cuu-xi sá vãha sá cúú-xí-ó, te ñá dǐú cuèndá ì<sup>n</sup> sá xéxí-ó nihí ndéé-ó ndècu-o ichi-gá. Te dava ñáyiũ càchí-yu sá dává nõú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndàá sá sã dúcá<sup>n</sup> vã cáxi-ó nchàa núú comidá níhí ndéé-ó cùndecu-o ichi-gá.

<sup>10</sup>Chi Xítóhó Jesucristú ní xíhí-gá cuèndá-ó nõú cùrúxí, te nchaa ñáyiũ nchìcú<sup>n</sup> nihnu-ni quide nchaa nàcuáa ní quide nchaa dútú ñí xinu cuechi nõú Yã Ndiõxí ndéé sanaha, ñáyiũ-á<sup>n</sup> vã cúú tnàhá tnúhu-yu ndihí Xítóhó Jesucristú Yaá ní xíhí núú cùrúxí sá dúcá<sup>n</sup> quidé-yu. <sup>11</sup>Chi dútú cùnùu-gá

ní xindecu ndihi cue ñáyiú isràél, téé-á<sup>n</sup> ñí xóo canehe-dé níñí nchaá quiti ní xóo cahni-dé ní xóo quíhu ndéé xití cuàrtú ní cuu íí-gă. Te duca<sup>n</sup> ñí xóo cada dútú-ă<sup>n</sup> cuèndá cada càhnu iní Yă Ndiöxí nchaá yíca cuèchi ñáyiú, te cuñú nchaá quiti-á<sup>n</sup> ñí xóo cahmi-güedé ì<sup>n</sup> xio yuhu ñùú. **12**Te duca<sup>n</sup> ñí yáha Xítohó Jesucrìstú chi ndéé ì<sup>n</sup> xio yuhu ñùú ní sahani ñaha-güedé xii-gă. Te cuèndá níñí-gă sá ñí sati núú cùrúxí núú ñí xíhí-gă, ní nduu ndoo ní nduu nine iní cue ñáyiú sàndáá iní ñáhá xii-gă. **13**Te vitna chí ná tùha-o Xítohó Jesucrìstú te cada ndee iní-ó ndòho-o datná ní ndoho-gă. **14**Te ñuyíú-a ni ì<sup>n</sup> xichi ñá túú ndéé cáá ì<sup>n</sup> ñúú cudíi ni caa ni quíhí<sup>n</sup> cuèndá cundecu-o, dico duca<sup>n</sup>-ni ñùhu iní-ó ì<sup>n</sup> xichi núú ndúú tǎhú-ó cundecu-o ni caa ni quíhí<sup>n</sup>.

**15**Te núu xǎ<sup>n</sup> xíní ñùhu-xi sá vǎ dáñá ndèé-ó chĩnuhu-o Dútú Ndiöxí chi Xítohó Jesucrìstú ní quide-gă nàcuáa ndacu-o tnàhá tnúhu-o ndìhi Yá Ndiöxí, te òré càhá<sup>n</sup> ndihi-o-gă te nuu núu ndacá<sup>n</sup> tǎhú-ó nǔú-gă. Te nchaá tnúhu càhá<sup>n</sup>-ó òré càhá<sup>n</sup> ndihi-o-gă cúú-xi dàtná ì<sup>n</sup> tǎhú sǎ cúú-xí-gă. **16**Te vǎ dáñá ndèé-ndó càda-ndo mee-ni sá vǎha cundecu-ndo, te duca<sup>n</sup> chĩndee tnaha-ndo ì<sup>n</sup> ì<sup>n</sup>-ndo ndihi sá ndécú ndìhi-ndo. Te núu duca<sup>n</sup> na càda-ndo te cani iní-ndó sǎ cúú-xí dàtná ì<sup>n</sup> tǎhú sǎ ìo vǎha cùu iní Yă Ndiöxí.

**17**Te quindáá iní-ndó càda-ndo nchaá nacuáa càhá<sup>n</sup> cue téé yĩndaha ñaha xii-ndo nacuáa ndècu-ndo ichi Xítohó Jesucrìstú, chi diu cue téé-á<sup>n</sup> quidé cuèndá ñáhá-güedé xii-ndo nàcuáa cundecu vǎha-ndo nǔú-gă. Te sáá nduu nàcani tnúhu-güedé núú-gă nǔu ní quide vǎha-güedé àdi ñá túú ní quide vǎha-güedé ní xindecu ndihi ñaha-güedé xii-ndo. Te núu duca<sup>n</sup> na càda-ndo quindáá iní-ndó-güedé te cudíi ìnì-güedé cundecu ndihi ñaha-güedé xii-ndo, te vǎ ndìhú iní-güedé. Te núu vǎ dúcá<sup>n</sup> càda-ndo te vǎ cúú-xí sǎ vǎha xii-ndo nchàa sá quidé-güedé sá cúú-xí-ndó.

**18**Te càhá<sup>n</sup> ndàhú-í núú-ndó sǎ cǎhá<sup>n</sup> ndihi-ndo Yă Ndiöxí cuèndá-ndí. Te nchúhú cútnùnì ndáá iní-ndí sá ñà túú nǎ cúmǎní-ndí núú Yă Ndiöxí, te duca<sup>n</sup> chi ndùcu-ndí nàcuáa quide-ndí cundáá-ndí núú-gă. **19**Te càhá<sup>n</sup> ndàhú tucu-í núú-ndó sǎ ìo cácá<sup>n</sup> tǎhú-ndó nǔú Yă Ndiöxí cuèndá sá méé-gă ná cádá te ìo ndìhi quixi coto ñaha tucu-í xii-ndo.

### **Tnúhu ndéé núú ñí ndihi-ná**

**20**Te Yá Ndiöxí Yaá quidé cùu vǎha iní-ó ndècu-o, Yaá-á<sup>n</sup> ñí dándótó-gă Xítohó Jesucrìstú. Te Xítohó Jesucrìstú-á<sup>n</sup> cúú-gă dàtná ì<sup>n</sup> toli ìo-gă quéné cǎva xito mbéé. Te duca<sup>n</sup> sǎtnahá-xi cùu-gă cuèndá sá ñí sati níñí-gă te ní xíhí-gă, te duca<sup>n</sup> ñí cuu cuèndá sá ñí quide ndáá-gă ndihi Yá Ndiöxí sá cádá-gă ingá núú sǎ vǎha sá cúú-xí nchòo cue ñáyiú ndècu ñuyíú-a. Te nàcuáa ní quide ndáá-gă ndihi Yá Ndiöxí te diu-ni duca<sup>n</sup> càda-xi núú cuàhá<sup>n</sup> núú vǎxi. **21**Te xìcá<sup>n</sup> tǎhú-í núú Yă Ndiöxí sá méé-gă ná chĩndee



ñaha-gá xii-ndo cuëndá cada-ndo mée-ni sá văha nàcuáa cuini méé-gă, te mee-gă ná cáda ñaha-gá xii-o nchaa sá văha sá sání iní-gá. Te diu-ni duca<sup>n</sup> na tàuchiu<sup>n</sup>-gá cada Xítohó Jesucristú sá cúu-xí-ó, duha xicá<sup>n</sup> táhù-í núu-gă. Te vitna nchaa-o chĩ ná cächí-ó sã ïo cãhnu cuu Xítohó Jesucristú ni caa ni quíhí<sup>n</sup>. Te duca<sup>n</sup> na cùnduu.

**22**Te cãhá<sup>n</sup> ndàhú-í núu nchòhó ñáyiu ndècu ndihi-í ichi Xítohó Jesucristú sá cáda cãhnu iní-ndó nàcuáa ndùu nchaa tnúhu cãhá<sup>n</sup>-í dásàhú ñáhà-í xii-ndo, chi ñá túú vãi tnúhu chido tnuní-í núu tütú-a sá cúu-xí-ndó.

**23**Te cächí tnúhu-í xii-ndo sã tẽ Timùteú té ndècu ndihi-o ichi Xítohó Jesucristú ní cácu-dé ñá túú-gă yíhí-dě vecaá. Te núu na quèxio ndíhi-dé núu ndécù-í te quixi-í ndihi-dé núu ndécú-ndó quixi coto ñaha-ndí.

**24**Te cúñaha-ndo sã ïo na càda ndee iní nchaa cue té yìndaha ñaha xii-ndo nacuáa ndècu-ndo ichi Yá Ndiöxí. Te duca<sup>n</sup> cũñaha tùcu-ndo xii nchaa dava-gá ñáyiu cùu cuendá-gá sá ïo na càda ndee iní-yu. Te cue ñáyiu nació<sup>n</sup> Itàliá ñáyiu ndècu ndihi-o ichi-gá cächí-yu sá ïo cada ndee iní-ndó.

**25**Te Yá Ndiöxí ío na chìndee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cáda ndèe iní-nă vitna.